

全五代詩  
附補遺

三





全·五·代·詩

附補遺

(三)

李調元編



成 集 書 叢

編 初

行 發 館 書 印 務 商

# 全五代詩卷十二

晉

裴 崐

崐字司東。河東人。唐光化中進士第。歷事梁唐。至晉高祖。官至工部尚書。拜右僕射卒。年八十。

五。贈太子太保。

五代史崐以文學在朝廷久。宰相馬允孫、桑維翰皆崐禮部所放進士也。後允孫舉放榜。引新進士詣崐。崐喜。作詩曰：門生門下見門生。世傳以為榮。維翰已作相。常過崐。崐不迎不送。人或問之。崐曰：我

見桑公於中書。庶寮也。桑公見我於私第。門生也。何送迎之有人。亦以為當。

示門生馬侍郎允孫

宦途最重是文衡。天與愚夫著盛名。三主禮闈年八十。門生門下見門生。

崔 悅

悅字子文。深州安平人。梁貞明三年舉進士甲科。開封尹王瓚辟掌奏記。唐明宗拜翰林學士。

晉高祖時以戶部侍郎為學士承旨。拜尚書左丞。遷太常卿。改太子賓客。分司西京卒。

五代史悅為學

士。嘗草制為宰相桑維翰所改。力爭之。維翰不樂。悅知天福二年貢舉。時有進士孔英者。素有醜行。為當時所惡。悅初受命。往見維翰。維翰素貴尊嚴。而語簡。謂悅曰：孔英來矣。悅不諱其意。以謂為孔英先容。乃考英及第。物議大以為非。遂罷。

學士職。五代會要。晉天福四年十二月。太常奏正至王公上壽。皇帝舉酒。奏元同之樂。皇帝三飲。皆奏文同之樂。食。舉奏昭德之舞。次奏成功之舞。皇帝降坐。奏大同之樂。其辭並崔悅造。唐餘錄曰。天福五年十一月冬至。朝羣臣。舉觴奏元同。三爵登歌。奏文同。四爵登歌。作羣臣飲。宮縣樂作。又奏龜茲及霓裳法曲。以須食畢於時。衆聞龜茲法曲。雅鄭雜糅。固已非之。明年正旦。上壽登歌。發聲悲離煩慙。如虞殯薤露之音。觀者以爲不祥。

羣臣酒行歌

劍佩儼如林。齊傾拱北心。渥恩頒美祿。咸獲聽和音。一德君臣合。重瞳日月臨。歌時兼樂聖。唯待贊泥金。萬國咸歸禹。千官共祝堯。拜恩瞻鳳展。傾耳聽雲韶。連啓金行遠。時和玉燭調。酒酣齊抃舞。同賀聖明朝。令節陳高會。羣臣侍御筵。玉墀留愛景。金殿靄祥烟。振鷺涵天澤。靈禽下樂懸。聖明無一事。何處讓堯年。

李濤

濤字信臣。避地湖南。事馬殷。後唐天成初。舉進士。仕晉。爲中書舍人。後歷事漢。晉。周。至平章事。入宋卒。唐摭言。濤有句云。溪聲長在耳。山色不離門。又掃地樹留影。拂牀琴有聲。又落日長安道。秋槐滿地花。吟窗雜錄。諫晉主不從。作詩云。一言寤主寧復聽。三諫不從歸去來。石林詩話云。俗稱社日飲酒治蠶。昉時爲翰

林學士。有月給內庫酒。故濤從乞之。詩云。春社從李昉。乞酒。社公今日沒心情。爲乞治蠶酒一瓶。惱亂玉堂將欲徧。依稀巡到第三廳。社公濤小字。濤性滑稽。泥水關有僧。每過必省。未幾寺焚。僧散。因題詩云。走卻坐禪客。移將不動尊。世間顛倒事。八萬四千門。又濤弟澣。娶竇尙書女。年甲已高。出參。濤望塵下拜。曰。只將謂親家母。又作歇後語云。慙無竇建。媿作梁山。聞者莫不絕倒。

春晝回文

茶餅嚼時香透齒。水沈燒處碧凝烟。紗窗閉着猶慵起。極困新晴乍雨天。

### 李 澣

澣字日新。澣之弟。後唐天成中擢進士第。仕晉爲翰林學士。所著有丁年集。

揮塵後錄。五代李澣與弟澣俱負才望。澣仕石

晉。爲學士。澣在西掖。澣後仕契丹。通顯。宋史。澣幼聰敏。慕王楊

盧駱爲文章。後代唐侍郎楊凝式撰錢鏐王神道碑。文彩適麗。時輩稱之。

### 蒙求

王戎簡要。裴楷清通。孔明臥龍。呂望非熊。楊震關西。丁寬易東。謝安高潔。王導公忠。匡衡鑿壁。孫敬閉戶。邛都蒼鷹。甯成乳虎。周嵩狼抗。梁冀跋扈。郗超頽參。王珣短簿。伏波標柱。博望尋河。李陵初詩。田橫感歌。武仲不休。士衡患多。桓譚非讖。王商止訛。嵇呂命駕。程孔傾蓋。劇孟一敵。周處三害。胡廣補闕。袁安倚賴。黃霸政殊。梁習治最。墨子悲絲。楊朱泣岐。朱博烏集。蕭芝雉隨。杜后生齒。靈王出髭。賈誼忌鵬。莊周畏犧。燕昭築臺。鄭莊置驛。瓘靖二妙。岳湛連璧。郗詵一枝。戴馮重席。鄒陽長裾。王符逢掖。鳴鶴日下。士龍雲間。晉宣狼顧。漢祖龍顏。鮑靚記井。羊祜識環。仲容青雲。叔夜玉山。毛義捧檄。子路負米。江革忠孝。王覽友弟。蕭何定律。叔孫制禮。葛豐刺舉。息躬歷詆。管寧割席。和嶠專車。時苗留犢。羊續懸魚。樊噲排闥。辛毘引裾。孫楚漱石。郝隆曬書。枚臯詣闕。充國自贊。王衍風鑑。許劭月旦。賀循儒宗。孫綽才冠。太叔辨洽。摯仲辭翰。山濤識量。毛玠公方。袁盎卻座。衛瓘撫牀。于公高門。曹參趣裝。庶女振風。鄒衍降霜。范丹生塵。晏嬰脫粟。

詰汾興魏。鼈靈王蜀。不疑誣金。卞和泣玉。檀卿沐猴。謝尚鳴鶴。秦初日月。季野陽秋。荀陳德星。李郭仙舟。  
王侗繡被。張氏銅鈎。丁公遽戮。雍齒先侯。陳雷膠漆。范張雞黍。周侯山嶷。會稽霞舉。季布一諾。阮瞻三語。  
郭文游山。袁宏泊渚。黃琬對日。秦宓論天。孟軻養素。揚雄草元。向秀聞笛。伯牙絕弦。郭槐自屈。南郡猶憐。  
魯恭馴雉。宋均去獸。廣客蛇影。殷師牛鬪。元禮模楷。季彥領袖。魯褒錢神。崔烈銅臭。梁竦廟食。趙溫雄飛。  
枚乘蒲輪。鄭均白衣。陵母伏劍。軻親斷機。齊后破環。謝女解圍。鑿齒尺牘。荀勗音律。胡威推縑。陸續懷橘。  
羅含吞鳥。江淹夢筆。李廡清貞。劉麟高率。蔣詡三徑。許由一瓢。楊僕移關。杜預建橋。壽王議鼎。杜林駁堯。  
西施捧心。孫壽折腰。靈輒扶輪。魏顆結草。逸少傾寫。平子絕倒。澹臺毀壁。子罕辭寶。東平爲善。司馬稱好。  
公超霧市。魯般雲梯。田單火牛。江迤燕雞。蔡裔殞盜。張遼止啼。陳平多轍。李廣成蹊。陳遵投轄。山簡倒載。  
淵客泣珠。交甫解佩。龔勝不屈。孫寶自劾。呂安題鳳。子猷訪戴。董宣彊項。翟璜直言。紀昌貫蝨。養由號猿。  
馮衍歸里。張昭塞門。蘇韶鬼靈。盧充幽婚。震畏四知。秉去三惑。柳下直道。叔敖陰德。張湯巧詆。松周深刻。  
三王尹京。二鮑糾憲。孫康映雪。車允聚螢。李充四部。井春五經。谷永筆札。顧愷丹青。戴逵破琴。謝敷應星。  
阮宣杖頭。畢卓甕下。文伯羞鼈。孟宗寄鮓。史丹青蒲。張湛白馬。隱之感隣。王修輟社。阮放八簫。江鳧四凶。  
華歆忤旨。陳羣蹙容。王濬懸刀。丁固生松。姜維膽斗。盧植音鐘。桓溫奇骨。鄧艾大志。楊修捷對。羅友默記。  
杜康造酒。蒼頡制字。樗里智囊。邊韶經笥。滕公佳城。王果石崖。買妻恥醮。澤室犯齋。馬后大練。孟光荆釵。  
顏叔秉燭。宋宏不諧。鄧通銅山。郭況金穴。秦彭攀轅。侯霸臥轍。淳于炙輶。彥國吐屑。太真玉臺。武子金埒。

巫馬戴星。宓賤彈琴。郝廉留錢。雷義送金。逢萌挂冠。胡昭投簪。王喬雙屨。華佗五禽。程邈隸書。史籀大篆。王承魚盜。丙吉牛喘。賈琮褰帷。郭賀露冤。馮媛當熊。班女辭輦。王充閱市。董生下帷。平叔傅粉。宏治凝脂。楊生黃雀。毛子白龜。宿瘤采桑。漆室憂葵。韋賢滿籬。夏侯拾芥。阮簡曠達。袁耽俊邁。蘇武持節。鄭衆不拜。郭巨將坑。董永自賣。仲連蹈海。范蠡泛湖。文寶緝柳。溫舒截蒲。伯道無兒。嵇紹不孤。綠珠墜樓。文君當壚。伊尹負鼎。甯戚叩角。趙壹坎壈。顏驄蹇剝。龔遂勸農。文翁興學。晏御揚揚。五鹿嶽嶽。蕭朱結綬。王貢彈冠。龐統展驥。仇覽栖鸞。葛亮顧廬。韓信升壇。王褒柏慘。閔損衣單。蒙恬製筆。蔡倫造紙。孔伋緼袍。祭遵布被。周公握髮。蔡邕倒屣。王敦傾室。紀瞻出妓。暴勝持斧。張綱埋輪。靈運曲笠。林宗折巾。屈原澤畔。漁父江濱。魏勃埽門。潘岳望塵。京房推律。翼奉觀性。甘寧奢侈。陸凱貴盛。干木富義。於陵辭聘。元凱傳癖。伯英草聖。馮異大樹。千秋小車。漂母進食。孫鍾設瓜。壺公謫天。薊訓歷家。劉元刮席。晉惠聞墓。伊籍一拜。酈生長揖。馬安四至。應璩三入。郭解借交。朱家脫急。虞延剋期。盛吉垂泣。豫讓吞炭。鉏麀觸槐。阮孚蠟屐。祖約好財。初平起石。左慈擲杯。武陵桃源。劉阮天台。王儉墜車。褚淵落水。季倫錦障。春申珠履。甄后出拜。劉楨平視。胡嬪爭搏。晉武傷指。石慶數馬。孔光溫樹。翟湯隱操。許詢勝具。優旃滑稽。落下歷數。曼容自免。子平畢娶。師曠清耳。離婁明目。仲文照鏡。臨江折軸。欒巴喫酒。偃師舞木。德潤傭書。君平賣卜。叔寶玉潤。彥輔冰清。衛后髮鬢。飛燕體輕。元石沈湎。劉伶解醒。趙勝謝躡。楚莊絕纓。惡來多力。飛廉善走。趙孟疵面。田駢天口。張憑理窟。裴頡談藪。仲宣獨步。子建八斗。廣漢鉤距。宏羊心計。衛青拜幕。去病辭第。酈寄賣友。紀信詐帝。

濟叔不癡。周兄無慧。虞卿擔簦。蘇章負笈。南風擲孕。商受斲涉。廣德從橋。君章拒獵。應奉五行。安世三篋。相如題柱。終軍棄繻。孫晨橐席。原憲桑樞。端木辭金。鍾離委珠。季札挂劍。徐穉致芻。朱雲折檻。申屠斷鞅。衛玠羊車。王恭鶴氅。管仲隨馬。蒼舒稱象。丁蘭刻木。伯瑜泣杖。陳達豪爽。田方簡傲。黃向訪主。陳實遺盜。龐儉鑿井。陰方祀竈。韓壽竊香。王濛市帽。句踐投醪。陸抗嘗藥。孔愉放龜。張顥墮鵠。田豫儉素。李恂清約。義縱攻剽。周陽暴虐。孟陽擲瓦。賈氏如臯。顏回簞瓢。仲蔚蓬蒿。糜竺收資。桓温登高。雷煥送劍。呂虔佩刀。老萊斑衣。黃香扇枕。王祥守柰。蔡順分椹。淮南食時。左思十稔。劉惔傾釀。孝伯痛飲。女媧補天。長房縮地。季珪士首。長孺國器。陸玩無人。賈詡非次。何晏神伏。郭奕心醉。常林帶經。高鳳漂麥。孟嘉落帽。庾凱墮幘。龍逢板出。張華台坼。董奉活變。扁鵲起號。寇恂借一。何武去思。韓子孤憤。梁鴻五噫。蔡琰辨琴。王粲覆棋。西門投巫。何謙焚祠。孟嘗環珠。劉昆反火。姜肱共被。孔融讓果。端康相代。亮陟隔坐。趙倫鷗怪。梁孝牛禍。桓典避馬。王尊叱馭。鼃錯峭直。趙禹廉倨。亮遺巾幘。備失七箸。張翰邊意。陶潛歸去。魏儲南館。漢相東閣。楚元置醴。陳蕃下榻。廣利泉湧。王霸冰合。孔融坐滿。鄭崇門雜。張堪折轅。周鎮漏船。郭伋竹馬。劉寬蒲鞭。許史侯盛。韋平相延。雍伯種玉。黃尋飛錢。王允千里。黃憲萬頃。虞駿才望。戴淵鋒穎。史魚黜殯。子囊城郢。戴封積薪。耿恭拜井。汲黯開倉。馮驩折券。齊景駟千。何曾食萬。顧榮錫炙。田文比飯。稚珪蛙鳴。彥倫鶴怨。廉頗負荊。須賈擢髮。孔翊絕書。申嘉私謁。淵明把菊。眞長望月。子房取履。釋之結韉。郭丹約關。祖逖誓江。賈逵問事。許慎無雙。婁敬和親。白起抗降。蕭史鳳臺。宋宗雞窗。王陽囊衣。馬援薏苡。劉整交質。五倫十起。

張敞畫眉。謝鯤折齒。盛彥感螭。姜詩躍鯉。宗資主諾。成瑨坐嘯。伯成辭耕。嚴陵去釣。董遇三餘。譙周獨笑。將閻仰天。士凌呼廟。二疏散金。陸賈分麥。慈明八龍。禰衡一鶚。不占隕車。子雲投閣。魏舒堂堂。周舍諤諤。無鹽如漆。姑射若冰。邾子投火。王思怒蠅。符朗阜曰。易牙淄澠。周勃織薄。灌嬰販繒。馬良白眉。阮籍青眼。鯨布開關。張良燒棧。陳遺飯感。陶侃酒限。楚昭萍實。束皙竹簡。曼倩三冬。陳思七步。劉寵一錢。廉范五袴。汜毓字孤。郗鑒吐哺。荀弟轉酷。嚴母掃墓。洪喬擲水。陳泰挂壁。王述忿狷。荀粲惑溺。宋女愈謹。敬姜猶績。鮑照篇翰。陳琳書檄。浩浩萬古。不可備甄。芟繁撫華。爾曹勉旃。

留題座主和凝舊閣

座主登庸歸鳳闕。門生批詔立鰲頭。玉堂舊閣多珍玩。可作西齋潤筆不。

楊昭儉

昭儉、後唐長興中進士、殿中丞侍御史、事石晉、爲翰林學士、入宋、官尙書卒。

贈夢英大師

紀贈歌詩數百人。序師多藝各求新。未言篆隸飛龍鳳。且說風騷感鬼神。琴有古聲清耳目。鶴無凡態惹埃塵。英公所學還如此。不錯承恩近紫宸。

題家園

池蓮憔悴無顏色。園竹低垂減翠陰。園竹池蓮莫惆悵。相看恰似主人心。

鄭遨

遨字雲叟。滑州白馬人。昭宗時舉進士不第。入少室山爲道士。徙居華陰。種田自給。與道士李道殷羅隱之友善。世目爲三高士。晉高祖以諫議大夫召不起。遂賜號逍遙先生。天福中卒。年

七十四

三山老人語錄。五代時鄭遨茶詩云。維憂碧粉散。嘗見綠花生。范文正公詩云。黃金碾畔綠塵飛。碧玉甌中翠瀉起。茶色以白爲貴。二公皆以碧綠言之何耶。詩話。鄭徵君詩皆祛淫靡。迴絕鷲塵。

山居

陶見有人尋。移庵更入深。落花流澗水。明月照松林。醉勸頭陀酒。閑教孺子吟。身同雲外鶴。斷得世塵侵。冥心棲太室。散髮浸流泉。採柏時逢麝。看雲忽見山。夏狂衝雨戲。春醉戴花眠。絕頂登雲望。東都一點烟。不求朝野知。臥見歲華移。採藥歸侵夜。聽松飯過時。荷竿尋水釣。背局上巖棋。祭廟人來說。中原正亂離。

茶

嫩芽香且靈。吾謂草中英。夜臼和烟搗。寒鑪對雪烹。惟憂碧粉散。常見綠花生。最是堪珍重。能令睡思清。

富貴曲

美人梳洗時。滿頭間珠翠。豈知兩片雲。戴卻數鄉稅。

傷農

一粒紅稻飯。幾滴牛領血。珊瑚枝下人。銜杯吐不歇。

詠西施

素面已云妖。更著花鈿飾。臉橫一寸波。浸破吳王國。

思山詠

因賣丹砂下白雲。鹿裘惟惹九衢塵。不如將爾入山去。萬是千非愁殺人。

招友人遊春

難把長繩繫日烏。芳時偷取醉工夫。任堆金壁磨星斗。因賣丹砂下白雲。鹿裘惟惹九衢塵。不如將爾入山去。萬是千非愁殺人。

招友人遊春

難把長繩繫日烏。芳時偷取醉工夫。任堆金壁磨星斗。買得花枝不老無。

宿洞庭

月到君山酒半醒。朗吟疑有水仙聽。無人識我真閑事。贏得高秋看洞庭。

題病僧寮

佛前香印廢晨燒。金錫當門照寂寥。童子不知師病困。報風吹折好芭蕉。

題霍山秦尊師

老鶴元猿伴採芝。有時長歎獨移時。翠娥紅粉渾如劍。殺盡世人人不知。

偶題

似鶴如雲一箇身。不憂家國不憂貧。擬將枕上日高睡。賣與世間榮貴人。帆力劈開滄海浪。馬蹄踏破亂山青。浮名浮利濃如酒。醉得人心死不醒。

景福中作

悶見戈鋌匝四溟。恨無奇策救生靈。如何飲酒得長醉。直到太平時節醒。

與羅隱之聯句

一壺天上有名物。兩個世間無事人。邀醉卻隱之雲叟外。不知何處是天真。隱之

使北者

墨鴉詩

五代詩話。幽薊數州自石晉賂戎後。懷中華不已。有使北者。見燕中傳舍壁畫墨鴉甚工。旁題詩云云。

要識塗鴉意。栖遲未得歸。星稀月明夜。皆欲向南飛。

調元按。原本只有下二句。上二句應是後人附會。姑並存以俟考。

天嶠遊人

題鄧仙客墓

鄧仙客。晉延康代爲國師。錫紫服。葬麻姑山。

鶴老芝田雞在籠。上清那與俗塵同。既言白日升仙去。何事人間有殯宮。

馬重績絲辭

占隨卦絲辭

重績明于數術。晉高祖時為司天監。從賓反。命筮之。遇隨。重績語其絲云。歲將秋矣。無能為也。七月而從賓果敗。

南瞻析木。木不自續。虛而動之。動隨其覆。

遼述律后謠

青牛嫗。曾避路。

遼太祖后述律氏生而有雄略。嘗至遼土二河之會。有女子乘青牛車。倉卒避路。忽不見。未幾童謠云云。諺謂地祇為青牛嫗。後果配太祖稱地皇后云。

晉出帝詠天詩

青異錄。晉出帝不善詩。時為俳諧語。詠天詩云云。

高平上監碧翁翁。

晉朝響樂章

初舉酒文同樂

赫矣昌運。明哉聖王。文興墜典。禮復舊章。鴛鸞濟濟。鳥獸跄跄。一人有慶。萬壽無疆。

舉酒

大明御宇。至德動天。君臣慶會。禮樂昭宣。劍佩成列。金石在縣。椒觴再獻。寶歷萬年。

再舉酒

朝野無事。寰瀛大康。聖人有作。盛禮重光。萬國執玉。千官奉觴。南山永固。地久天長。

四舉酒

八表歡無事。三秋賀有成。照臨同日遠。渥澤並雲行。河變千年色。山呼萬歲聲。願修封岱禮。方以稱文明。

晉昭德成功舞歌

唐餘錄晉天福五年詔有司復修正至朝會二舞之制以文舞爲昭德之舞武舞爲成功之舞十一月冬至遂奏之於時二舞久廢衆喜於復興而樂工舞員雜取教坊以滿之聲節靡曼綴兆合節而無遠

促遲速之累及明年正旦再奏聲容蹈厲進退無列議者非之五代史樂志曰文武六十四人左手執籥右手秉翟冠進賢冠服黃紗袍白紗中單皂領襖白練蓋襠白布大口袴革帶烏皮履白布襪武舞六十四人左手執干右手執戚服弁平巾幘金支緋絲布大袖緋絲布兩襠甲金飾白練蓋襠錦騰蛇起梁帶豹文大口布袴烏皮靴

昭德舞歌二首

聖代修文德。明庭舉舊章。兩階陳羽籥。萬舞合宮商。劍佩森鴛鷺。簫韶下鳳凰。我朝青史上。千古有輝光。淮海干戈戢。朝廷禮樂施。白駒皆就繫。丹鳳復來儀。德備三苗格。風行萬國隨。小臣同百獸。率舞賀昌期。

武功舞歌二首

撥亂資英主。開基自晉陽。一戎成大業。七德煥前王。炎漢提封遠。姬周世祚長。朱干將玉戚。全象武功揚。睿算超前古。神功格上圓。百川留禹跡。萬國戴堯天。旣已櫜弓矢。誠宜播管弦。踰踰隨鳥獸。共樂太平年。

全五代詩卷十三

漢

張昭

昭本名昭遠。避漢祖諱。止稱昭。字潛夫。濮州范縣人。歷仕唐晉。至漢為兵部尚書。封舒國公。入宋卒。有嘉善集。

宋史昭既冠。以父失所在。時盜賊蠭起。道路榛梗。乃自秦抵蜀。徒行丐食。求父所在。積十年不能得。乃發哀行服。躬耕海濱。青州王師範開學館。延至儒士。再以書幣招置署賓職。師範降梁。直脫難北歸。以

周易春秋教授。學者自遠而至。時號逍遙先生。昭始十歲。能誦古樂府。詠史詩百餘篇。朱冠徧讀九經。盡通其義。處儕類中。緩步闊視。以為馬鄭不以若也。後至贊皇。遇程生者。專史學。以為專究經旨。不通今古。率多拘滯。繁而寡要。若極談王霸。經緯治亂。非史不可。因出班范漢書十餘義。商榷乃授昭荀紀國志等。後又盡得十三史。五七年間。能馳騁上下數千百年事。又注十代興亡論。處亂世。躬耕負米以養親。後父卒。服闋。召為戶部侍郎。以唐史未成。詔與呂琦崔悅等續成之。別置史館。命昭兼判院事。昭又撰唐朝君臣正論二十五卷上之。改兵部侍郎。八年遷吏部。判東銓。兼史館修撰。判館事。開運二年秋。唐書成。二百卷。加金紫。增進爵邑。三年拜尚書右丞。判流內銓。權知貢舉。漢初復為吏部侍郎。時追尊六廟。定謚號樂章武曲。命昭權判太常卿事。月餘。即真。乾祐二年。加檢校禮部尚書。少帝年十九。猶有童心。昵比羣小。昭上言。請聽政之暇。數召儒臣講論經義云。

漢宗廟樂舞辭

高廟明靈再啓圖。金根玉輅幸神都。巢阿丹鳳銜書命。入昴飛星獻寶符。正撫薰弦娛赤子。忽登仙駕泣

蒼梧薦櫻鶴館笳簫咽。酌鬯金楹劍珮趨。星俎雲壘兼魯禮。朱干象箛雜巴渝。氤氳龍麝交情瑣。髣髴錫鑾下藥珠。薦豆奉觴親玉几。配天合祖耀璿樞。受釐飲酒皇歡洽。仰俟餘靈泰九區。

夜吟寶鞏集。追思夷門題處已三稔矣。悽然感興書之。

往歲記時梁苑夜。今宵題處洛城秋。浮生瞥電人何在。懷舊傷心淚迸流。三徑竹風隣笛怨。一庭霜月井梧愁。妻兒未會予惆悵。只怪燈前不舉頭。

### 王仁裕

仁裕字德輦。天水人。初爲秦州判官。入蜀爲中書舍人。翰林學士。歷唐晉。至漢爲戶部尙書。太

子少保致仕。卒。所作有西江集。

十國春秋。仁裕少時嘗夢剖其腸胃。以西江水滌之。願見江中沙石皆成篆籀之文。由是文思日進。生平作詩逾萬首。蜀人呼曰詩窖子。宋事實類苑。王公終於

太子太保。七十後精方不衰。每天氣和暖。必乘小駟。從二四老蒼頭。攜照袋。以皮爲之。四方有蓋。其中可容一斗。以來。中貯筆硯韻略。刀子礪石。箋紙數十幅。并小樂器之屬。備酒炙三五人之具。門生侍行。出郊野。遇園亭有竹樹之處。燕賞終日。賦詩品小管。盡醉而歸。胡孝轅癸籤。公宴合樂。每酒行一終。伶人必唱嚙酒。然後樂作。此唐人送酒之詞。本作碎音。今多作平聲。文士亦惑之。葉石林引王仁裕詩。淑景易從風雨去。芳尊須用管弦嚙爲證。然仁裕本集自作開字。下聯仍有催韻。石林不知據何本也。全唐詩話。仁裕大散關句云。鐵鎖寨門扃白日。大張旗幟插青天。

上梓潼山從蜀後主幸秦川作

綵杖拂寒烟。鳴騶在半天。黃雲生馬足。白日下松巔。盛德安疲俗。仁風扇極邊。前程問成紀。此去上三千。

題劍門 和蜀後主作

孟陽曾有語。刊在白雲稜。李杜常挨托。孫劉亦恃憑。庸才安可守。上德始堪矜。暗指長天路。濃巒蔽幾層。

荆南席上咏胡琴妓二首

天下大定錄云。荆南高氏。先建清宮于府西北隅。延袤十餘里。亭榭花木甚盛。從誨紹立。尤加完葺。廣招伶倫樂籍。間多有梁園舊物。從誨明音律。僻好胡琴。有女妓數十。皆善其事。仁

裕使荆渚。從誨開宴。出

十妓彈胡琴。爲詩美之。

紅粧齊抱紫檀槽。一株朱絃四十條。湘水淩波慚鼓瑟。秦樓明月罷吹簫。寒敲白玉聲偏婉。暝逼黃鶯語自嬌。丹禁舊臣來側耳。骨清神爽似聞韶。

玉纖挑落折冰聲。散入秋空韻轉清。二五指中勾塞雁。十三絃上囀春鶯。譜從陶室偷將妙。曲向秦樓寫得成。無限細腰宮裏女。就中偏愜楚王情。

題麥積山天堂

玉堂間話云。麥積山者。北跨清渭。南漸兩當。岡巒崛起。一石高萬尋。其青雲之半。梯空架險。有散花樓。由西閣懸梯而上。有萬菩薩堂。並就石鑿成。自此室之上。有一龕。謂之天堂。空中倚一獨梯。至此萬中無一

人敢登者。仁裕獨登之。仍題詩

于天堂西壁。前唐末辛未年也。

躡盡懸空萬仞梯。等閒身共白雲齊。簷前下視羣山小。堂上平分落日低。絕頂路危人少到。古巖松健鶴頻棲。天邊爲要留名姓。拂石殷勤手自題。

題斗山觀

玉堂閑話云興元斗山觀自平川聳起一山四面懸絕其上方於斗底故號之有唐公昉飲李八百仙酒全家拔宅之跡仁裕辛巳歲為節度判官嘗以片板題詩于觀癸未年入蜀因謁嚴真觀見斗山詩牌在焉不知所來舊

說雲斗山一洞與嚴真觀井相通也

霞衣欲舉醉陶陶

公昉家飲八百洗瘡酒醉而上昇

不覺全家住絳霄。拔宅只知雞犬在。上天誰信路歧遙。三清遼廓拋塵

夢。八景雲烟事早朝。為有故林蒼柏健。露華涼葉鎖金飈。

題孤雲絕頂淮陰祠

玉堂閑話云興元之南有大竹路通巴州深谿峭巖捫蘿一上三日達山頂復登嶺其絕頂謂之孤雲兩角彼中諺云孤雲兩角去天一握淮陽侯祠在焉昔漢祖不用韓信遜歸西楚蕭相國追

之及于茲山故立廟貌仁裕嘗佐褒梁帥王思同南伐巴人往返登陟留題于祠

一握寒天古木深。路人猶說漢淮陰。孤雲不掩興亡策。兩角曾懸去住心。不是冕旒輕布素。豈勞丞相遠追尋。當時若放還西楚。尺寸中華未可侵。

和韓昭從駕過白衛嶺

龍旆飄飄指極邊。到時猶更二三千。登高曉蹋巉巖石。冒冷朝衝斷續烟。自學漢皇開土宇。不同周穆好神仙。秦民莫遣無恩及。大散關東別有天。

賀王溥入相

石林詩話云仁裕知貢舉取王溥為狀元時年二十六後六年溥拜相時仁裕猶致仕無恙賀以詩曰

一戰文場拔趙旗。便調金鼎佐無爲。白麻驟降恩何極。黃髮初聞喜可知。跋勅案前人到少。築沙堤上馬歸遲。立班始得遙相見。親洽爭如未貴時。

與諸門生春日會飲繁臺賦

柳陰如霧絮成堆。又引門生飲古臺。淑景卽隨風雨去。芳樽宜命管絃開。謾誇列鼎鳴鐘貴。寧免朝烏夜兔催。爛醉也須詩一首。不能空放馬頭回。

示諸門生

談錄云。仁裕知貢舉時。已年高。有數子皆早亡。諸孫並幼。一日生徒畢集。出詩牋曰。

二百一十四門生。春風初長羽毛成。擲金換得天邊桂。罄壁偷將榜上名。何幸不才逢聖世。偶將疎網罩羣英。衰翁漸老兒孫小。異日知誰略有情。  
五代史補。陶穀讀三四聯曰。大奇。大奇。不意王仁裕今日做賊頭也。

過平戎谷弔胡颺

颺有文學。佐荆湖藩幕。善草軍書。薨視副軍。擢之主帥。盡室坑平戎谷。仁裕過而弔之。

立馬荒郊滿目愁。伊人何罪死林邱。風號古木悲長在。雨溼寒莎淚暗流。莫道文章爲衆嫉。只應輕薄是身讐。不緣魂寄孤山下。此地堪名鸚鵡洲。

奉詔賦劍州途中鷲獸

蜀後主幸秦川。至劍州西。鷲獸于路左叢林間躍出。搏一人去。至行宮。顧問臣僚皆陳恐懼。命仁裕及李清弼等賦之。後主覽之。大笑曰。二臣之詩各有旨。

劍牙釘舌血毛腥。窺算勞心豈暫停。不與大朝除患難。惟於當路食生靈。從將尸口資噉口。未委三丁稅

幾丁今日帝王親出狩。白雲巖下好藏形。

放猿

仁裕從事漢中有獻猿兒者憐其點慧育之名曰野寶經年壯大跳擲頗為患繫紅綃于頸題詩送之

放爾丁寧復故林。舊來行處好追尋。月明巫峽堪憐靜。路隔巴山莫厭深。棲宿免勞青嶂夢。躋攀應愜白雲心。三秋果熟松梢健。任抱高枝徹曉吟。

遇所放猿再作

仁裕罷職入蜀行次漢江壩蟠冢廟前見一巨猿捨羣而前於道畔古木間垂身下顧紅綃宛在以野寶呼之聲聲應立馬移時不覺惻然遂繼之一篇云

蟠冢祠前漢水濱。飲猿連臂下嶙峋。漸來子細窺行客。認得依稀是野賓。月宿縱勞羈綫夢。松餐非復稻粱身。數聲腸斷和雲叫。識是前時舊主人。

符彥卿

彥卿字冠侯。陳州宛邱人。後唐中書令存審之子。漢乾祐中。加中書令。封魏國公。歸宋卒。

劉斧清瑣

高議大夫丞相李公昉嘗言。當日日外鎮為麓官符

彥卿知汴州。有詩云云。公之詩意。蓋有憾之詞爾。

知汴州作

全軍十萬擁雄師。正是酬恩報國時。汴水波濤喧鼓角。隋堤楊柳拂旌旗。前驅紅旆關西將。環坐青蛾趙國姬。為報長安冠蓋道。麤官到底是男兒。

趙逢

逢字常夫。媯州懷戎人。漢乾祐中擢甲科。授祕書郎直史館。入宋。官諫議大夫卒。

宋史逢敷歷清近所至有聲然

傷慘酷。又言多詆訐。故縉紳目之爲鐵槩。

懷夢英太師

林巒影裏有清賢。與我相知二十年。書札愛工精玉篆。利名拋捨住金田。吟容賈島稱詩匠。醉許劉伶作酒仙。別後近聞棲華嶽。亂雲應得恣情眠。

王著

著字成象。單州單父人。漢乾祐中進士。官至翰林學士。入宋卒。

贈夢英大師

到處聞人乞篆蹤。學來年久有深功。墨池闊類湘江水。筆冢高齊太華峰。金錫罷飛新解虎。鐵盂收掌舊降龍。知師吟戀烟村景。不肯回頭望九重。

許仲宣

仲宣字希粲。青州人。漢乾祐中進士。官至太子中允。入宋卒。

宋史仲宣爲濟陰主簿。時令與簿分掌縣印。令畜嬖妾。與其室爭寵。令弗能禁。嬖欲

陷其主竊取其印藏之封識如故以授仲宣翼日署事發匣則無其印因逮捕縣吏數輩及令簿家人下獄鞠問果得之於令舍竈突中令聞之倉皇失措仲宣處之晏然人服其量

清洛喜英公大師相訪

方袍紫染出彤庭久在林泉養性靈無事撓心長見醉有名傳世不曾醒多年別我頭先白此日逢師眼倍青記得上都相會否夜飛杯篆老君經

鍾離權

離權咸陽人自言生於漢遇江南許堅授仙訣又遇華陽真人上仙王元甫傳道入崆峒山自

號雲房先生

宣和書譜神仙鍾離先生名權不知何時人問出接物自謂生于漢呂洞賓于先生執弟子禮自稱天下都散漢字畫飄然有凌雲氣事實類苑邢州開元寺僧院有五代時隱士鍾離樞草書詩三絕筆勢遒

逸其詩云云後從廣知邢州勒詩于石

示太原學士

風燈泡沫兩想悲未肯遺榮自保持領下藏珠當猛取身中有道更求誰才高雅稱神仙骨知照靈如大寶龜一半青山無買處與君攜手話希夷

雲麓漫抄莊綽跋云昔維揚有何仙姑者世以爲謫仙能與真靈接一日鍾離過之使治黃素乃書此詩呂公亦跋其後令侯王學士至授之後數日王古敏仲自

貳卿出守會稽至維揚訪姑即以與之王祕不以示人

草書詩

露滴紅蘭玉滿畦。閑拖象履到峯西。但令心似蓮花潔。何必身將槁木齊。古塹細香紅樹老。半峯殘雪白  
猿啼。雖然不是桃花洞。春至桃花亦滿溪。

夷堅志淳熙十一年溧陽倉斗子坐盜官米黥配而籍其家得草書二軸題云庚申歲書其名權花押止如一劍之狀蓋鍾離翁也其詞云云李粹伯跋之曰字畫放逸有翔龍舞鳳之勢脫去尋常畦徑非得于心而應于手者不能爾飄然神仙風度固有所本云真本藏于建康府治軍質庫絹素標飾處皆斷裂獨字畫不動景裝嘗見之庚申歲者豈非藝祖創業建隆元年乎

題長安酒肆壁三絕

坐臥常攜酒一壺。不教雙眼識皇都。乾坤許大無名姓。疎散人中一丈夫。  
得道真僧不易逢。幾時歸去願相從。自言住處連滄海。別是蓬萊第一峯。  
莫厭追歡笑語頻。尋思離亂好傷神。閑來屈指從頭數。得見清平有幾人。



# 全五代詩卷十四

漢

呂巖

巖字洞賓。禮部侍郎渭之孫。蒲坂縣人。咸通中舉進士不第。遊長安。值黃巢亂。隱居終南山。漢時遇鍾離權得道。年百餘歲。貌如嬰兒。世傳有劍術。時至陳搏室。不知所終。

全唐詩話。洞賓遊長沙。持小瓦罐。乞錢。得錢無

算。而罐常不滿。有僧驅一車錢。戲曰。汝罐能容之否。及推車入罐。憂憂有聲。俄不見。僧曰。神仙耶。幻術耶。呂仙口占答之曰。非神亦非仙。非術亦非幻。天地有終窮。桑田幾遷變。身固非我有。財亦何足戀。曷不從吾遊。騎鯨騰汗漫。談苑。張洎家居城外。有一隱士。自云呂巖。洎倒屣迎之。索紙筆。八分書七言一章。頗言將作鼎鼎之意。其末句云。功成當在破瓜年。俗以破瓜字爲二八。洎六十八而卒。乃其應也。仙翁詩人多傳誦。飲海龜兒人不識。燒丹符子鬼難看。又一粒粟中藏世界。半升鑿裏煮山川之句。蒙齋筆談。洞賓。呂渭之後。五代間從鍾離權遊。權漢人。不老。自本朝以來。與權更出沒人間。權不甚多。而洞賓蹤跡數見。好道者每以爲口實。余記童子時。見大父魏公自湖外罷官。還道岳州。客有言洞賓事者云。近歲常過城南一古寺。題二詩壁間而去。說者云。寺有一大古松。呂始至時。每能知者。有老人自松顛徐下致恭。故詩云。然。西溪叢語。襄漢隱者躬耕數畝。因古冢爲亭。往來題詩甚富。一日柱間得一絕云。冢上爲亭鬼莫嘆。冢頭人卽冢中人。凭欄莫起存亡意。除卻空虛總是塵。相傳呂翁作也。王漁洋五代詩話。回仙有沁園春一闋。明內丹之旨。語意深妙。惜乎世人但歌其詞。不究其理。吾故表而顯之云。七返還丹在人。先須煉己待時。正一陽初動。中宵漏永。溫溫鉛鼎。光透

簾幃造化爭馳。虎龍交合。進火功夫。尤鬪危曲江上。看月華瑩淨。有箇鳥飛。當時自飲刀圭。又誰信無中養就兒。辨水源清濁。木金間隔。不因師指。此事難知。道要元微。天機深遠。下手速修。修猶太遲。蓬萊路仗。三千行滿。獨步雲歸。調元按。呂巖唐末宋初人。未知何時得道。今據王漁洋五代詩話。故入五代。又其所師鍾離權。故編於漢末鍾後。

搖頭坯歌

搖頭坯。隨雨破。祇是未曾經水火。若經水火燒成磚。留向世間住。萬年稜角堅。完不復壞。扣之聲韻堪磨。鑄凡水火。尙成功。堅完萬物誰能同。修行路上多少人。窮年煉養費精神。不道未曾經水火。無常一旦臨君身。既不悟。終不悔。死子猶來借精髓。主持正念大艱辛。一失人身爲異類。君不見洛陽富鄭公。說與金丹如盲聾。執迷不悟修真理。焉知潛合造化功。又不見九江張尙書。服藥失明神氣枯。不如還丹本無質。翻餌金石何太愚。又不見三衢趙樞密。參禪作鬼終不識。修完外體在何邊。辯捷語言終不實。搖頭坯。隨雨破。便似修行這幾箇。大丈夫。超覺性。了盡空門不爲證。伏羲傳道至于今。窮理盡性至於命。了命如何是本元。先認坎離并四正。坎離卽是真常家。見者超凡須入聖。坎是虎。離是龍。二體本來同一宮。龍吞虎啗居其中。離合浮沈初復終。剝而復。否而泰。進退往來定交會。弦而望。明而晦。消長盈虛相匹配。神仙深入水晶宮。時飲醍醐清更醴。餌之千日功。便成金筋玉骨身。已輕。此箇景象惟自身。上昇早得朝三清。三清聖位我亦有。本來只奪乾坤精。飲凡酒。食羶腥。補養元和冲更盈。自融結轉光明變。作珍珠。飛玉京。須臾六年腸不餒。血化白膏體難毀。不食方爲真絕糧。真氣薰蒸肢體強。既不食。超百億。口鼻都無凡喘息。

真人以踵凡以喉。從此真凡兩邊立。到此遂成無漏身。胎息丹田湧真火。老氏自此號嬰兒。火候九年都經過。留形住世不知春。忽爾天門頂中破。真人出現大神通。從此天仙可相賀。聖賢三教不異門。昧者勞心休恁麼。有識自愛生。有形終不滅。歎愚人空駕說。愚人流蕩無則休。落趣循環幾時徹。學人學人細尋覓。且須研究古金碧。金碧參同不計年。妙中妙兮元中元。

贈劉方處士

六國愁看沉與浮。攜琴長獻出神州。擬向煙霞煮白石。偶來城市見丹邱。受得金華出世術。期於紫府駕雲遊。年來摘得黃巖翠。琪樹參差連地肺。露飄香隴玉苗滋。月上碧峰丹鶴唳。洞天消息春正深。仙路往還俗難繼。忽因乘興下白雲。與君邂逅於塵世。塵世相逢開口希。共論太古同流志。瑤琴寶瑟與君彈。瓊漿玉液勸我醉。醉中亦話興亡事。云道總無珪組累。浮世短景倏成空。石火電光看卽逝。韶年淑質曾非固。花面玉顏還作土。芳樽但繼曉復昏。樂事不窮今與古。何如識箇元元道。道在杳冥須細考。壺中一粒化奇物。物外千年功力奧。但能制得水中華。水火翻成金丹竈。丹就人間不久居。自有碧霄元命誥。元洲陽谷悉可居。地壽天齡永相保。鸞車鶴駕逐雲飛。迢迢瑤池應易到。耳聞爭戰還傾覆。眼見奸華成枯槁。唐家舊國盡荒蕪。漢室諸陵空白草。蜉蝣世界實足悲。槿花性命莫遲遲。珠璣溢屋非爲福。羅綺滿箱徒自危。志士戒貪昔所重。達人忘欲寧自期。劉方劉方審聽我。流光迅速如飛過。陰媿果決用心除。尸鬼因循爲汝禍。八瓊祕訣君自識。莫待鈇空車又破。破車壞鈇須震驚。直遇伯陽應不可。悠悠憂家復憂國。耗

盡三田元宅火。咫尺元關若要開。憑君自解黃金鎖。

勉牛生夏侯生

二秀才。二秀才。兮非秀才。非秀才。兮是仙才。中華國裏親遭遇。仰面觀天笑眼開。鶴形兮龜骨。龍吟兮虎顏。我有至言相勸勉。願君兮勿猜。勿猜但煦日吹月。嚙雨呵雷。火寄冥宮。水濟丹臺。金木交而土歸位。鉛汞分而丹露胎。赤血換而白乳流。透九竅兮動百骸。然然卷。然然舒。哀哀哈哈。孩兒喘而不死。腹空虛兮長齋。酬名利兮狂歌醉舞。酬富貴兮麻綴莎鞋。甲子問時休記。看桑田變作黃埃。青山白雲好居住。勸君歸去來兮歸去來。

題四明金鵝寺壁

方丈有門出不鑰。見箇山童露雙腳。問伊方丈何寂寥。道是虛空也不著。聞此語。何欣欣。主翁豈是尋常人。我來謁見不得見。謁心耿耿生埃塵。歸去也。波浩渺。路入蓬萊山。杳杳相思一上石樓時。雪晴海闊千峰曉。

長短行

落魄且落魄。夜宿鄉村。朝遊城郭。閑來無事翫青山。困來街市貨丹藥。賣得錢。不算度。酤美酒。自斟酌。醉後吟哦動鬼神。任意日頭向西落。

贈江州大平觀道士

落魄辟高士。年高無白髭。雲中閑臥石。雪裏去尋碑。誇我飲大酒。嫌人念小詩。不知甚麼漢。一任輩流嗤。

通道

通道復通元。名留四海傳。交親一柱杖。活計兩空拳。要果逡巡種。思茶逐旋煎。豈知來混世。不久卻回天。

六言

春暖羣花半開。逍遙石上徘徊。獨攜玉律丹訣。閑踏青莎碧苔。古洞眠來九載。流霞飲幾千杯。逢人莫話他事。笑指白雲去來。

送鍾離雲房

功滿東來際會難。又聞東去上仙壇。杖頭春色一壺酒。頂上雲攢五嶽冠。飲酒龜兒人不識。燒山符子鬼難看。先生去後身須老。乞與貧儒換骨丹。

贈劍客二首

髮頭滴血眼如環。吐氣雲生怒世間。爭耐不平千古事。須期一訣蕩兇頑。蛟龍斬處翻滄海。暴虎除時拔遠山。爲滅世情兼負義。劍光腥染點痕斑。

雨雪霏霏天已暮。金鍾滿勸撫焦洞。詩吟席上未移刻。劍舞筵前疾似風。何事行杯當午夜。忽然怒目便騰空。不知誰是虧忠孝。攜箇人頭入坐中。

仙詩

落魄紅塵四十春。無爲無事信天真。生涯只在乾坤鼎。活計惟憑日月輪。八卦氣中潛至寶。五行光裏隱元神。桑田改變依然在。永作人間出世人。

我家勤種我家田。內有靈苗活萬年。花似黃金苞不大。子如白玉顆皆圓。栽培全賴中宮土。灌溉須憑上谷泉。直候九年功滿日。和根拔入大羅天。

尋常學道說黃芽。萬水千山覓轉茆。有畛有園難下種。無根無腳自開花。九三鼎內烹如酪。六一爐中結似霞。不日成丹應換骨。飛升遙指玉皇家。

纔吞一粒便安然。十二重樓九曲連。庚虎循環餐絳雪。甲龍天喬迸靈泉。三三上應三千日。九九中延九萬年。須得有緣方可授。未曾輕泄與人傳。

誰識寰中達者人。生平解法水中銀。一條拄杖撐天地。三尺昆吾斬鬼神。大醉醉來眠月洞。高吟吟去傲紅塵。自從悟裏終身後。贏得蓬壺永劫春。

本末無非在玉都。亦曾陸地作凡夫。吞精食氣先從有。悟理歸真便入無。水火自然成既濟。陰陽和合自相符。爐中煉出延壽藥。溟渤從教變復枯。

杳杳冥冥莫問涯。雕蟲篆刻道之華。守中絕學方知奧。抱一無言始見佳。自有物如黃菊蕊。更無色似碧桃花。休將心地虛勞用。煮鐵燒金轉轉差。

還丹功滿未朝天。且向人間度有緣。拄杖兩頭擔日月。葫蘆一箇隱山川。詩吟自得閑中句。酒飲多遺醉

後錢。若問我修何妙法。不離身內永和鉛。  
舉世何人悟我家。我家別是一榮華。盈箱貯積登仙錄。滿室收藏伏火砂。頓飲長生天上酒。常栽不死洞  
中花。凡流若問吾生計。遍地紛紛五彩霞。  
亂雲推裏表星都。認得深藏大丈夫。綠酒醉眠閑日月。白蘋風定釣江湖。長將氣度隨天道。不把言詞問  
世徒。山水路遙人不到。茅君消息近知無。  
鶴爲車駕酒爲糧。爲戀長生不死鄉。地脈尙能縮得短。人年豈不展教長。星晨往往壺中見。日月時時衲  
裏藏。若欲時流親得見。朝朝不離水銀行。  
世上何人會此言。休將名利挂心田。等閑倒盡十分酒。遇興高吟一百篇。物外烟霞爲伴侶。壺中日月任  
嬋娟。他時功滿歸何處。直駕雲車入洞天。  
公卿雖貴不曾酬。說著仙鄉更去遊。爲討石肝逢蜃海。因尋甜雪過瀛州。山川醉後壺中放。神鬼閑來匣  
裏收。據見目前無箇識。不如杯酒混凡流。  
曾邀相訪到仙家。忽上崑崙宴月華。玉女控攏蒼獬豸。山童提挈白蝦蟇。時斟海內千年酒。慣摘壺中四  
序花。今在人寰人不識。看看揮袖入烟霞。  
火種丹田金自生。重重樓閣自分明。三千功行百旬見。萬里蓬萊一日程。羽化自應無鬼錄。玉都長是有  
仙名。今朝得赴瑤池會。九節幢幡洞裏迎。

莫怪愛吟天上詩。蓋緣吟得世間稀。慣餐玉帝宮中飯。曾著蓬萊洞裏衣。馬踏日輪紅露捲。鳳銜月角壁雲飛。何時再控青絲轡。又掉金鞭入紫微。

雲鬢雙明骨更輕。自言尋鶴到蓬瀛。日論藥草皆知味。問著神仙自得名。簪冷夜龍穿碧洞。枕寒晨虎臥銀城。來春又擬攜筇去。爲憶軒轅海上行。

龍精龜眼兩相和。丈六男兒不柰何。九盞水中煎赤子。一輪火內養黃婆。月圓自覺離天網。功滿方知出地羅。半醉好吞龍鳳髓。勸君休更認彌陀。

強居此境絕知音。野景雖多不合吟。詩句若喧卿相口。姓名還動帝王心。道袍薜帶應慵挂。隱帽皮冠尙懶簪。除此更無餘箇事。一壺村酒一張琴。

欲陪仙侶得身輕。飛過蓬萊徹上清。朱頂鶴來雲外接。紫鱗魚向海中迎。姮娥月桂花先吐。王母仙桃子漸成。下瞰日輪天欲曉。定知人世久長生。

四海皆忙幾箇閑。時人口內說塵緣。知君有道來山上。何似無名住世間。十二樓臺藏祕訣。五千言內隱元關。方知鼎貯神仙藥。乞取刀圭一粒看。

當年詩價滿皇都。掉臂西歸是丈夫。萬頃白雲獨自有。一枝丹桂訶誰無。閑尋渭曲漁翁引。醉上蓮峰道士扶。他日與君重際會。竹溪茅舍夜相呼。

傾側華陽醉再三。騎馬遇晚下南巖。眉因拍劍留星電。衣爲眠雲惹碧嵐。金液變來成雨露。玉都歸去老

松杉曾將鐵鏡照神鬼。霹靂搜尋火滿潭。  
琴劍酒棋龍鶴虎。逍遙落托永無憂。閑騎白鹿遊三島。悶駕青牛看十洲。碧洞遠觀明月上。青山高隱綠  
雲流。時人若要還如此。名利浮華即便休。  
別來洛汭六東風。醉眼吟情慵不慵。擺撼乾坤金劍吼。烹煎日月玉爐紅。杖搖楚甸三千里。鶴翥秦烟幾  
萬重。爲報晉成仙子道。再期春色會稽峰。  
未煉還丹且煉心。丹成方覺道元深。每留客有錢沽酒。誰信君無藥點金。洞裏風雷歸掌握。壺中日月在  
胸襟。神仙事業人難會。養性長生自意吟。  
鐵牛耕地種金錢。刻石時童把貫穿。一粒粟中藏世界。二升鐺內煮山川。白頭老子眉垂地。碧眼胡兒手  
指天。若向此中元會得。此元元外更無元。  
箕星昴宿下長天。凡景寧教不愕然。龍出水來鱗甲就。鶴冲天去羽毛全。塵中教化千人眼。世上人知爾  
雅篇。自是凡流福命薄。忍教微妙略輕傳。  
曾隨劉阮醉桃源。未省人間欠酒錢。一領布裘權且當。九天回日卻歸還。鳳茸襖子非爲貴。狐白裘裳欲  
比難。只此世間無價寶。不憑火裏試燒看。  
因思往事卻成愁。曾讀仙經第十三。武氏死時應室女。陳王沒後是童男。兩輪日月從他載。九箇山河一  
擔擔。盡日無人話消息。一壺春酒且醺酣。

萬卷仙經三尺琴。劉安聞說是知音。杖頭春色一壺酒。爐內丹砂萬點金。悶裏醉眠三路口。閑來遊釣洞庭心。相逢相遇人誰識。只恐冲天沒處尋。

曾戰蚩尤玉座前。六龍高駕振鳴鑾。如來車後隨金鼓。黃帝旂傍戴鐵冠。醉捋黑鬚三島黯。怒抽霜劍十洲寒。軒轅世代橫行後。直隱深巖久覓難。

頭角蒼浪聲似鐘。貌如冰雪骨如松。匣中寶劍時頻吼。袖裏金鎚逞露風。會飲酒時爲伴侶。能行詩句便參同。來年定赴蓬萊會。騎箇生獰九色龍。

九鼎烹煎一味砂。自然火候放童花。星辰照出青芝顆。日月能藏白馬牙。七返返成生碧霧。九還還就吐紅霞。有人奪得元珠餌。三島途中路不賒。

誰解長生似我哉。煉成真氣在三台。盡知白日昇天去。剛逐紅塵下世來。黑虎行時傾雨露。赤龍耕處產瓊瑰。只吞一粒金丹藥。飛入青霄更不回。

遙指高峰笑一聲。紅霞紫霧面前生。每於塵市無人識。長到山中有鶴行。時弄玉蟾驅鬼魅。夜煎金鼎煮瓊英。他時若赴蓬萊洞。知我仙家有姓名。

黃芽白雪兩飛金。行卽高歌醉卽吟。日月暗扶君甲子。乾坤自與我知音。精靈滅跡三清劍。風雨騰空一弄琴。的當南遊歸甚處。莫交鶴去上天尋。

自隱元都不記春。幾回滄海變成塵。玉京殿裏朝元始。金闕宮中拜老君。悶卽駕乘千歲鶴。閑來高臥九

重雲我今學得長生法。未肯輕傳與世人。  
隨緣信業任浮沉。似水如雲一片心。兩卷道經三尺劍。一條藜杖七弦琴。壺中有藥逢人施。腹內新詩遇  
客吟。一嚼永添千載壽。一丸丹點一斤金。  
春盡閑閑過落花。一回舞劍一吁嗟。常憂白日光陰促。每恨青天道路賒。本志不求名與利。元心只慕永  
兼霞。世間萬種浮沈事。達理誰能似我家。

留詩與巴陵太守

真人行巴陵市。太守怒其不避。使案吏具其罪。真人曰。須酒醒耳。頃忽失之。但留詩曰。

暫別蓬萊海上遊。偶逢太守問根由。身居北斗星杓下。劍挂南宮月角頭。道我醉來真箇醉。不知愁是怎  
生愁。相逢何事不相認。卻駕白雲歸去休。

贈陳處士搏

青霄一路少人行。休話興亡事不成。金榜因何無姓字。玉都必是有仙名。雲歸入海龍千尺。雪滿長空鶴  
一聲。深謝宋朝明聖主。解書丹詔詔先生。

哭陳先生搏

天網恢恢萬象疎。一身親到華山區。寒雲去後留殘月。春雪來時問太虛。六洞真人歸紫府。千年鸞鶴老  
蒼梧。自從遺卻先生後。南北東西少丈夫。

別詩

無心獨坐轉黃庭。不逐時流入利名。救老只存真一氣。修生長遣百神靈。朝朝煉液歸瓊壠。夜夜朝元養玉英。莫笑老人貧裏樂。十年功滿上三清。

贈羅浮道士

羅浮道士誰同流。草衣木食輕王侯。世間甲子管不得。壺裏乾坤只自由。數着殘棋江月曉。一聲長嘯海山秋。飲餘回首話歸路。遙指白雲天際頭。

答僧

三千里外無家客。七百年來雲水身。行滿蓬萊爲別館。道成瓦礫盡黃金。待賓榼裏常存酒。化藥爐中別有春。積德求師何患少。由來天地不私親。

賜齊州李希遇詩

少飲欺心酒。休貪不義財。福因慈善得。禍向巧姦來。

贈滕宗諒

華州回道人。來到岳陽城。別我遊何處。秋空一劍橫。

題詩紫極宮

宮門一閑入。臨水憑欄立。無人和我來。朱頂鶴聲急。

呈鍾離雲房

生在儒家遇太平。縣纓重滯布衣輕。誰能世上爭名利。臣事玉皇歸上清。

絕句

不用梯媒向外求。還丹只在體中收。莫言大道人難得。自是功夫不到頭。  
學道須教徹骨貧。囊中只有五三文。有人問我修行法。遙指天邊日月輪。  
肘傳丹篆千年術。口誦黃庭兩卷經。鶴觀古壇松影裏。悄無人跡戶長扃。  
天下都遊半日功。不須跨鳳與乘龍。偶因博戲飛神劍。摧卻終南第一峯。  
朝遊百越暮蒼梧。袖裏青蛇膽氣麤。三入岳陽人不識。朗吟飛過洞庭湖。  
吾家本住在天齊。零落白雲鑠石梯。來往八千消半日。依前歸路不曾迷。  
東山東畔忽相逢。握手丁寧語似鐘。劍術已成君把去。有蛟龍處斬蛟龍。  
朝泛蒼梧暮卻還。洞中日月我爲天。匣中寶劍時時吼。不遇同人誓不傳。  
偶巖拍手葫蘆舞。過嶺穿雲拄杖飛。來往八千須半日。金州南畔有松扉。  
精養靈根氣養神。此真之外更無真。神仙不肯分明說。迷了千千萬萬人。  
不事王侯不種田。日高猶自抱琴眠。起來旋點黃金買。不使人間作業錢。  
莫道幽人一事無。閑中儘有靜工夫。閉門清晝讀書罷。掃地焚香到日晡。

贈劍客四首

先生先生貌癯惡。拔劍當空氣雲錯。連喝三回急急去。剌然空裏人頭落。劍起星奔萬里誅。風雷時逐雨聲麤。人頭攜處非人在。何事高吟過五湖。纔眉卓豎語如雷。聞說不平便放杯。仗劍當空千里去。一更別我二更回。龐眉鬪豎惡精神。萬里騰空一踴身。背上匣中三尺劍。爲天且示不平人。

牧童

草鋪橫野六七里。笛弄晚風三四聲。歸來飽飯黃昏後。不脫蓑衣臥月明。

弱翁帥平涼。一方士通謁。有牧童牽黃犢隨之。弱翁指牧童曰。道人頗能賦此。

乎。方士笑曰。不煩我語。是兒能之。牧童乃操筆大書云云。或云方士卽呂公也。

潭州鶴會

這回相見不無緣。滿院風光小洞天。一劍當空又飛去。洞庭驚起老龍眠。

贈曹先生

鶴不西飛龍不行。露乾雲破洞簫清。少年仙子說閑事。遙隔綵雲聞笑聲。

題鳳翔府天慶觀

得道年來八百秋。不曾飛劍取人頭。玉皇未有天符至。且貨烏金混世流。

洞庭湖君山頌

午夜君山翫月回。西隣小圃碧蓮開。天香風露蒼華冷。雲在青霄鶴未來。

題永康酒樓

鯨吸鰲吞數百杯。玉山誰起復誰頽。醒時兩袂天風冷。一朵紅雲海上來。

題壁

西隣已富憂不足。東老雖貧樂有餘。白酒釀來緣好客。黃金散盡爲收書。

題黃鶴樓石照

黃鶴樓前吹笛時。白蘋紅蓼滿紅湄。衷情欲訴誰能會。惟有清風明月知。

警世

二八佳人體似酥。腰間仗劍斬凡夫。雖然不見人頭落。暗裏教君骨髓枯。

爲賈師雄發明古鐵鏡

手內青蛇凌白日。洞中仙果豔長春。須知物外烟霞客。不是塵中磨鏡人。

題全州道士蔣暉壁

醉舞高歌海上山。天瓢承露結金丹。夜深鶴透秋空碧。萬里西風一劍寒。

題廣陵妓屏二首

嫫母西施共此身。可憐老少隔千春。他年鶴髮雞皮媪。今日玉顏花貌人。  
花開花落兩悲歡。花與人還事一般。開在枝間妨客折。落來地上請誰看。

題壁

崔中舉進士遊岳陽遇真人錄沁園春詞詰其姓名薦之李守排戶而入惟見留詩于壁

腹內嬰兒養已成。且居塵市暫娛情。無端措大剛饒舌。卻入白雲深處行。

閑題

獨自行來獨自坐。無限世人不識我。惟有城南老樹精。分明知道神仙過。

絕句

息精息氣養精神。精養丹田氣養身。是人學得這般術。便是長生不死人。  
斗笠爲帆扇作舟。五湖四海任遨遊。大千沙界須臾至。石欄松枯經幾秋。

恆超

恆超姓馮氏。范陽人。居棣州開元寺。終於後漢之乾祐。

辭郡守李公恩命

虛著褐衣老。浮杯道不成。誓傳經論死。不染利名生。厭樹遮山色。憐窗向月明。他時隨范蠡。一棹五湖清。

淨顯五代時洛陽首座沙門後漢初卒

題廣愛寺楞伽山闕首二句

靈異不能棲鳥雀。幽奇終不着猿猱。爲經巢賊應無損。縱使秦驅也漫勞。珍重昔賢留像迹。陵遷谷變自堅牢。

漢宗廟樂舞辭

五代史樂志曰。漢宗廟酌獻樂舞。文祖室奏靈長之舞。德祖室奏積善之舞。翼祖室奏顯仁之舞。顯祖室奏章慶之舞。高祖室觀德之舞。唐餘錄曰。高祖追尊四祖廟。且遠引漢之二祖爲口室。張昭因傳會其禮。乃曰。太祖高皇帝創業垂統。室奏武德之舞。世祖光武皇帝再造不基。室奏大武之舞。自如其舊。而大武卽用東平王蒼詞云。

武德舞

明明我祖。天集休明。神母夜哭。彤雲晝興。籩豆有踐。管籥斯登。孝孫致告。神其降靈。

靈長舞

天降祥漢。祚昌火炎。上水靈長。建廟社潔。蒸嘗羅鐘。石儼珩璜。陳玉豆酌。金觴氣昭。感德馨香。祇洛汭瞻。晉陽降吾祖。福穰穰。

積善舞

黍稷斯馨。祖德惟明。蛇告赤帝。龜謀大橫。雲行雨施。天成地平。造我家邦。幹我璿衡。陶匏在御。醴盎惟精。或戛或擊。載炮載烹。飲福受胙。舞降歌迎。滔滔不竭。洪惟水行。

顯仁舞

運極金行謝天資。水德隆禮神廊時館。布政未央宮。詰旦備明祀。登歌答茂功。雲軒臨降久。星俎薦陳豐。靄靄沈檀霧。鏘鏘環佩風。熒煌升藻藉。肸鬩轉珠櫳。尊祖咸韶備。貽孫書軌同。京坻長有積。宗享享無窮。

章慶舞

罽毼曉唱雞人三。牲八簋斯陳。霧集瑤階瑣闥。香生綺席華茵。珠佩貂璫熠燿。羽旄干戚紛綸。酌鬯既終三獻。凝旒何止千春。阿閣長棲綵鳳。郊宮疊奏祥麟。赤伏英靈未泯。元圭運祚重新。玉罍犧樽瀲灩。龍旂鳳轄逡巡。瞻望月遊冠冕。猶疑蒼野回輪。

# 全五代詩卷十五

周

王朴

朴字文伯。東平人。少舉進士。爲校書郎。周世宗鎮壇州。辟掌書記。卽位遷北郭郎中。獻平邊策。遷左諫議大夫。知開封府事。充端明殿學士。世宗慨然有平一天下之志。引朴計議天下事。無不合。遂決意用朴。拜戶部侍郎。遷樞密使。留守京師。顯德六年春。遣視汴口。還過故相李穀弟。疾作。仆于坐上。昇歸卒。年五十四。世宗臨其喪。以玉鉞叩地大慟者數四。贈侍中。

五代史。世宗之時。外事征伐而

內修法度。朴爲人明敏多材智。非獨當世之務。至於陰陽律歷之法。莫不通焉。顯德二年。詔朴校定大歷。乃削去近世符天流俗不經之學。設通經統三法。以歲軌離交朔望周變率策之數。步日月五星爲欽天歷。六年。又詔朴考正雅樂。朴以謂十二律管互吹難得其真。乃以京房爲律。准以九尺之絃十三。依管長短寸分設柱。用七聲爲均。樂成而和。朴性剛果。又見信於世宗。凡其所爲。當時無敢難者。然人亦莫能加也。世宗征淮。朴留京師。廣新城。通道路。壯偉宏闊。今京師之制。多其所規爲。其所作樂。至今用之不可變。其陳用兵之略。非特一時之策。至言諸國興滅次第云。淮南可最先取。并必死之寇最後亡。其後宋興。平定四方。惟并獨後服。皆如朴言。

## 周郊祀樂章

羽衛離丹闕。金軒赴泰壇。珠旗明月色。玉佩曉霜寒。黼黻龍衣備。琮璜寶器完。百神將受職。宗社保長安。

扈載

載字仲熙。北燕人。周廣順初。舉進士高第。拜校書郎直史館。遷監察御史。遷水部員外郎翰林

學士卒

五代史載為文章。以辭多自喜。常次歷代有國廢興治亂之迹。為運源賦甚詳。又因遊相國寺。見庭竹可愛。作碧鮮賦題其壁。世宗聞之。遣小黃門就壁錄之。覽而稱善。因拜學士。初載以文知名一時。樞密使王朴尤重其才。薦

于宰相李穀。久而不用。朴以問穀曰。扈載不為舍人何也。穀曰。非不知其才。然載命薄。恐不能勝。朴曰。公為宰相。以進賢退不肖為職。何言命邪。已而召拜知制誥。及為學士。居歲中。病卒。年三十六。議者為穀能知人。而朴能薦士。歐陽修史論。是時天子英武。樂延天下奇才。而尤禮文士。載與張昭、竇儼、陶穀、徐台符等俱被進用。穀居數人中。文辭最劣。尤無行。昭儼數與論議。其文粲然。而穀徒能先意所在。以進諛取合人主。事無大小。必稱美頌贊。至於廣京城為木偶。耕人紫芝白兔之類。皆為頌以獻。其辭大抵類俳優。而載以不幸早卒。論議雖不及昭儼。而不為穀之諛也。

芳草

幽芳無處無。幽處恨何如。倦客傷歸思。春風滿舊居。晚烟迷杏靄。朝露健扶疎。省傍靈光看。殘陽少皞區。

孟貫

貫字一之。建安人。仕周。官至大夫。

江西通志。貫少好學。嘗遊廬山。卜居其下。以禮義文章節儉為當時師範。人稱孟夫子。江南野錄。周世宗幸廣陵。貫以集獻。世宗見首卷。貽棲隱洞譚。

先生詩云。不伐有巢樹。多移無主花。謂貫曰。伐叛弔民。何有巢無主之有。獻朕則何。他人卿將不免逐。釋褐授官。其詩大諫楊徽之稱之。詩史。閩嶺貫性疎野。喜篇章。不以名宦爲意。大諫楊徽之稱之。加寄張山人草堂云。掃葉林風後。拾薪前。山雨。

山中夏日

深山宜避暑。門戶映嵐光。夏木蔭溪路。晝雲埋石牀。心源澄道靜。衣葛薰泉涼。算得紅塵裏。誰知此興長。

山齋早秋雨中

深居少往還。卷箔早秋間。雨洒吟蟬樹。雲藏嘯狖山。炎蒸如便退。衣葛亦堪閒。靜坐得無事。酒卮聊暢顏。

早秋吟眺

新秋新雨後。獨立對遙山。去鳥望中沒。好雲吟裏還。長年慙道薄。明代取身閒。從有西征思。園林懶閉關。

江邊閒步

閒來南渡口。迤邐看江楓。一路波濤畔。數家蘆葦中。遠汀排晚樹。深浦漾寒鴻。吟罷慵回首。此情誰與同。

冬日登江樓

高樓迎古岸。野步晚來登。江水因寒落。山雲爲雪凝。遠村雖入望。危檻不堪凭。親老未歸去。鄉愁徒自興。

過秦嶺

古今傳此嶺。高下勢崢嶸。安得青山路。化爲平地行。蒼苔留虎跡。碧樹障溪聲。欲過一回首。踟躕無限情。

過王逸人園林

谷口何時住。烟霞一徑深。水聲離遠洞。山色出疎林。雪彩從沾鬢。年光不計心。自言人少到。猶喜我來尋。

宿故人江居

渡口樹冥冥。南山漸隱青。漁舟歸舊浦。鷗鳥宿前汀。靜榻懸燈坐。閒門對浪扃。相思頻到此。幾番醉還醒。

宿山寺

溪山盡日行。方聽遠鐘聲。入院逢僧定。登樓見月生。露垂羣木潤。泉落一巖清。此景關吾事。通宵寐不成。

山中訪人不遇

負琴兼杖藜。特地過巖西。已見竹軒閉。又聞山鳥啼。長松寒倚谷。細草暗連溪。久立無人事。烟霞歸路迷。

山中答友人

偶愛春山住。因循值暑時。風塵非所願。泉石本相宜。坐久松陰轉。吟餘蟬韻移。自慙疎野甚。多失故人期。

酬東溪史處士

咫尺東溪路。年來偶訪遲。泉聲迷夜雨。花片落空枝。石徑僧逢出。山床鶴見移。貧齋有琴酒。曾許月圓期。

贈棲隱洞譚先生

譚紫霄授張道陵天心  
正法居廬山棲隱洞

先生雙鬢華。深谷臥雲霞。不伐有巢樹。多移無主花。石泉春釀酒。松火夜煎茶。因問山中事。如君有幾家。

贈隱者

世路爭名利。深山獨結茅。安情自得所。非道豈相交。百尺松當戶。千年鶴在巢。知君於此景。未欲等閒拋。

懷友人

浮世況多事。飄流每嘆君。路歧何處去。消息幾時聞。吟裏落秋葉。望中生暮雲。孤懷誰慰我。夕鳥自成羣。

懷果上人

擁錫南遊去。名香幾處焚。別來無遠信。多恐在深雲。好月曾同步。幽香省共聞。相思不相見。林下葉紛紛。

寄伍喬

蹉跎春又晚。天末信來遲。長憶分攜日。正當搖落時。獨遊饒旅恨。多事失歸期。君看前溪樹。山禽巢幾枝。

寄山中高逸人

烟霞多放曠。吟嘯是尋常。猿共摘山果。僧隣住石房。躡雲雙屐冷。採藥一身香。我憶相逢夜。松潭月色涼。

夏日寄史處士

掩關苔滿地。終日坐騰騰。暑氣冷衣葛。暮雲催燭燈。寂寥知得處。疎懶似無能。還憶舊遊否。何年別杜陵。

寄李處士

僧話磻溪叟。平生重赤松。夜堂悲蟋蟀。秋水老芙蓉。吟坐倦垂釣。閒行多倚筇。聞名來已久。未得一相逢。

寄張山人

草堂南澗邊。有客嘯雲烟。掃葉林風後。拾薪山雨前。野橋通竹逕。流水入芝田。琴月相親夜。更深戀不眠。  
夏日登瀑頂寺因寄諸知己

曾於塵裏望。此景在烟霄。巖靜水聲近。山深暑氣遙。杖藜青石路。煮茗白雲樵。寄語爲郎者。誰能訪寂寥。  
寄故園兄弟

久與鄉關阻。風塵損舊衣。水思和月泛。山憶共僧歸。村已添隣舍。溪應改釣磯。弟兄無苦事。不用別庭闈。  
寄暹上人

聞罷城中講。來安頂上禪。夜燈明石室。清磬出巖泉。欲訪慙多事。相辭恨隔年。終期息塵慮。接話虎溪邊。  
送吳夢閻歸閩

甄閩在天末。此去整行衣。久客逢春盡。思家冒暑歸。海雲添晚景。山瘴減晴暉。相憶吟偏苦。不堪書信稀。  
送江爲歸嶺南

舊山臨海色。歸路失天涯。此別各多事。重逢是幾時。江行晴望遠。嶺宿夜吟遲。珍重南方客。清風失所思。  
送人遊南越

子然南越去。替爾畏前程。見說路歧嶮。不通車馬行。瘴烟迷海色。嶺樹帶猿聲。獨向山家宿。多應鄉思生。  
送人歸別業

別業五湖上。殘春去路賒。還尋舊山水。重到故人家。門徑掩芳草。園林落異花。君知釣磯在。猶喜有生涯。

春江送人

春江多去情。相去枕長汀。數雁別湓浦。片帆離洞庭。雨餘沙草綠。雲散岸峰青。誰共觀明月。漁歌夜好聽。

秋江送客

秋風楚江上。送子話遊遨。遠水宿何處。孤舟春夜濤。浦雲沉雁影。山月照猿嗥。莫為饑寒苦。便成名利勞。

歸雁

春至衡陽雁。思歸塞路長。汀洲齊奮翼。霄漢共成行。雪盡翻風暖。寒收度月涼。直應到秋日。依舊返瀟湘。

韋遵

遵後周官至起居郎。

題施璘畫竹圖

枯籜危根繳石頭。千竿交映近清流。堪珍仲寶窮幽筆。留得荆湘一片秋。

安鴻漸

鴻漸周世宗時洛陽人。庶齋老學叢談李慶孫有文名時謂洛陽才子安鴻漸天下文章李慶孫

題楊凝式書

端州石硯宣城管。王屋松烟紫兔毫。更得孤卿老書札。人間無此五般高。

### 何承裕

承裕。韶州人。周世宗時。知商州官侍御。入宋卒。

五代史補。承裕有逸才。為小詞尤工。與陶穀素不協。世宗欲擢用承裕。陶奏已之。及陶之判銓。一旦偃息。何自外抗聲唱。

挽歌而入。陶甚驚駭。承裕曰。尚書豈長生不死者耶。幸甚無恙。聞其一兩曲。又何妨。陶無以抗。又承裕知商州。有舉人投卷。覽其詩。有曰。暮後猿啼旅思悽之句。遽曰。足下此句甚佳。但上句屬對未切。奉為改之。何不云。曉來犬吠張三婦。舉人大慙而去。其以滑稽為務如此。

### 寄宣義英公

書札精奇已換鵝。仍聞依舊臥烟蘿。詩成萬首猶嫌少。酒飲千鍾不怕多。鄉寺夜開雲夢月。石房寒鎖洞庭波。知師收拾南歸去。為憶漁人唱楚歌。

### 劉坦

坦後周進士第一人及第。恭帝時。李重進鎮淮南。辟為掌書記。

南部新書。坦狀元及第。為維揚李重進掌書記。好酒。李令酒庫。但書記有客。無

多少供之。尋掌庫吏頗恠之。因大書一絕于屏云云。重進讀之曰。小吏恠酒于書記也。立命斬之。坦悔而成疾。

### 書從事廳屏上

金殿試迴新折桂。將軍留辟向江城。思量一醉猶難得。辜負揚州管記名。

郭從義

從義其先沙陀部人父紹古事後唐武皇賜姓李氏從義補內職晉天福初復姓郭歷事四朝周世宗時以功加檢校太師兼中書令致仕卒

贈夢英大師

雲水僧來說我師換鵝書札轉高奇揮毫傳下千年事貞石曾留幾處碑混俗市鄽人莫識和光蹤跡鶴應知蓮花結社須容我不似陶潛愛酒卮

陶穀

穀字秀寔邠州新平人本唐彥謙之孫避晉諱改姓陶歷仕晉漢至周爲兵部侍郎翰林承旨入宋加尙書卒贈右僕射所著有清異錄

十國春秋穀使于吳越王宴於碧波亭因舉酒令曰白玉石碧波亭上迎仙客穀對曰口耳王聖明天子出錢塘又王置金鍾宴穀會穀

臥病請之贈以十副穀謝詩云乞與金鍾並眼明及出境復有井蛙休時險句人謂其狡譎 緗素雜記周世宗時陶尙書穀奉使江南韓熙載遣家妓奉盤匱及旦有書謝云巫山之麗質初臨霞侵鳥道洛浦之妖姬自至月滿鴻溝舉朝不能會其詞熙載因詔家妓訊之云是夕適浣濯焉 國老談苑陶穀又嘗奉使兩浙獻詩二十韻於錢俶其末云此生頭已白無路掃王門時穀官是承郎職爲學士奉命小邦獻詩已是失體復有掃門之句何辱命之甚也 玉壺清話朝廷使陶穀使江南以假書爲名實使覘之既至厓岸高峻燕席談笑未嘗啓齒韓熙載謂所親曰觀秀實公妄也非端人介士其守可矜夜遣歌伎秦弱蘭詐爲驛卒之女敝衣持帚灑掃驛庭五柳乘隙因詢其迹翌日以詞贈之曰好姻緣惡姻

緣只得郵亭一夜眠。別神仙。琵琶撥盡相思調。知音少。安得鸞膠續斷弦。是何年後數日。燕于澄心堂。李主命玻璃巨鐘滿酌之。穀毅然不顧。乃出弱蘭于席。歌前闕以侑之。穀慚笑。不敢不酬。醕罷復灌倒在吐茵。尙未許罷。大爲主所薄。還朝日止遣數小吏餞于郊亭。逮歸京。卒不大用。順存錄。穀來使。忠懿王宴之。因食螞蟻。詢其族類。王命自螞蟻至。蠶蟻凡十餘種以進。穀曰。真所謂一蟹不如一蟹。蓋以譏王也。王因命進葫蘆羹。曰。此先王時有此品味。庖人依樣造者。穀在中朝有詩云。年年依樣畫葫蘆。故王以此戲焉。全唐詩話。穀使南唐。題云。四川狗。百姓眼。馬包兒。御廚飯。宋齊丘解云。十字。包四字。云。獨眠孤館。據遺以爲驛中女兒所書。賈父詩話。今不用斷字。唐人作斯音。五代時。作入聲。陶穀詩云。尖簷帽子卑凡。斷是也。歐陽公記陶穀詩。末厥兵。不曉其意。余謂今人呼秃尾犬爲厥尾。衣之短者。亦呼爲厥。然則此兵。正謂其末賤耳。今人不以末厥相連言之。其義則是也。不然。則不可對卑凡。斷。畫墁錄。太祖嘗謂陶穀一雙鬼眼。續湘山野錄。國初。陶尙書以朝廷眷待詞臣不厚。乞罷禁林。太祖曰。此官職甚難作。依樣葫蘆。且作且作。不許罷。復不進用。因題玉堂云云。駕幸見之。愈不悅。卒不大用。清異錄。予讀胡蟠茶詩。露牙舊姓餘甘氏。破睡當封不夜侯。愛其新奇。猶子夔。年十二歲。令效法之。近晚成篇云。生涼好喚雞。蘇佛回味宜稱橄欖山。夔亦文辭之有基址者也。

寄贈夢英大師

是箇碑文念得全。聰明靈性自天然。離吳別楚三千里。入洛遊梁二十年。負藝已聞喧世界。高眠長見臥雲烟。相逢與我情何厚。問佛方知宿有緣。

題玉堂壁

官職須由生處有。文章不管用時無。堪笑翰林陶學士。年年依樣畫葫蘆。

李昉

昉字明遠。深州饒陽人。漢乾祐中舉進士。周顯德中仕至翰林學士。入宋拜中書侍郎平章事。

卒諡文正。有集。翰林名贊李文正公昉少時常以詩呈叔侍中覽而喜之詩曰及觀西里盛世秉鈞衡李氏自五代至本朝世居將相總龜附李文正進永昌陵宮辭云奠玉五迴朝上帝御樓三度納降王當時羣臣

皆進惟文正詞最為首出所謂三降王者廣南劉鋹西蜀孟昶江南李煜也。歷代吟譜昉有句云水光先見月露氣早知秋佳句也。馬令南唐書賓于歸南唐為塗陽令贖貨當死時李昉事皇朝為翰林學士乃賓于同年進士聞賓于縲紲以

詩遺之云云後主

見詩貸之復其官

贈賈黃中

七歲神童古所難。賈家門戶有衣冠。十人科第排頭上。五部經書誦舌端。見榜不知名字貴。登筵未識管弦歡。從今穩上青雲去。萬里誰能測羽翰。

寄孟賓于

幼攜書劍別湘潭。金榜標名第十三。昔日聲塵喧洛下。近年詩價滿江南。長為邑令情終屈。縱處曹郎志未甘。莫學馮唐便休去。明君晚事未為慚。

仙客

胎化仙禽性本殊。何人攜爾到京都。因加美號為仙客。稱向閑庭伴野夫。驚露秋聲雲外遠。翹沙晴影月

中孤青田萬里終歸去。暫處雞羣莫歎吁。

贈襄陽妓

峴山亭畔紅妝女。小筆香牋善賦詩。顏貌共推傾國色。篇章皆是斷腸辭。便牽魂夢從今日。得見嬋娟在幾時。千里關河萬重意。夜深無睡暗尋思。

禁林春直

疎簾搖曳日輝輝。直閣深嚴半掩扉。一院有花春晝永。八方無事詔書稀。樹頭百轉鶯鶯語。梁上新來燕燕飛。豈合此身居此地。妨賢尸祿自知非。

題岱宗無字碑

巨石來從十八盤。離宮複道滿千山。不因封禪窮民力。漢祖何緣便入關。

永昌陵輓詞

丹青史筆敢虛張。功德巍然軼漢唐。奠玉五回朝上帝。御樓三度納降主。

王溥

溥字齊物。并州祁人。漢乾祐中進士。爲祕書郎。周廣順初。拜端明殿學士。恭帝嗣位。官同平章事。右僕射。入宋。封祁國公。卒。諡康獻。有集。

石林詩話。五代王仁裕知貢舉。王丞相溥爲狀元時。年二十六。後六年。遂相周世宗。猶及本朝。以太子太保罷歸班。年才四十二。前此所

未有也。初溥拜相，仁裕致仕無恙，以詩和之。詩見前。

謝進士張翼投詩兩軸

清河詩客本賢良，惠我新吟六十章。格調宛同羅給事，功夫深似賈司倉。登山始覺天高廣，到海方知浪渺茫。好去蟾宮是歸路，明年應折桂枝香。

詠牡丹

棗花至小能成實，桑葉雖柔解吐絲。堪笑牡丹如斗大，不成一事又空枝。

范質

質字文素，大名宗城人。後唐長興四年進士，晉天福中為翰林學士。周廣順初，拜中書侍郎，同

中書門下平章事，入宋卒，封魯國公。有集。

邵氏聞見錄：魯公舉進士，和凝為主文，愛其文賦，凝自以第十三登第，謂魯公曰：君之文宜冠多士，屈居十三者，欲君傳老夫衣鉢耳。魯

公以為榮，至先後為相，有獻詩者云：從此廟堂添故事，登庸衣鉢亦相傳。周祖舉兵向闕，京師亂，魯公隱於民間。一日，坐封邱巷茶肆中，有人貌怪陋，前揖曰：相公無慮，時暑中公所執扇，偶書大暑去酷吏，清風來故人。詩二句，其人曰：世之酷吏冤獄，何止如大暑也。公他日當深究此弊，因攜其扇去。公惘然久之，後至祆廟，見一土偶短鬼，貌肖茶肆見者，扇亦在其手中。公心異焉。宋史：質生之夕，母夢神人，授以五色筆，九歲能屬文。晉宰相桑維翰深器之。漢初，加中書舍人、戶部侍郎。周祖征叛，每朝廷遣使齎詔，處分軍事，皆合機宜。周祖問誰為此辭，使者以質對，歎曰：宰相器也。周祖自鄴起兵向闕，京城擾亂，質匿民間，物色得之，喜甚。時大雪，解袍衣之。世宗不豫，入受顧命，恭帝嗣位，加開府儀同三司，封蕭國公。及太祖北征，為六

師推戴。自陳橋還府署。時質方就食闈中。太祖入。率王溥、魏仁浦就府謁見。太祖對之嗚咽流涕。具言擁逼之狀。質等未及對。軍校羅彥瓌舉刃擬質曰。我輩無主。今日須得天子。太祖叱彥瓌不退。質不知所措。乃與溥等降階受命。卒年五十四。將終。戒其子曼。勿請謚。勿刻墓碑。太宗嘗稱之曰。宰輔中能循規矩。慎名器。持廉節。無出質右者。但欠世宗一死。爲可惜爾。從子校書郎杲。求奏遷秩。質作詩曉之。時人傳誦。以爲勸戒。

誠兒姪八百字

昨得謝課書。希於京秩之中。更與遷轉。余以諸兒姪輩。生長以來。未諳外事。艱難損益。懵然莫因。扞古詩一章曉之。

去年初釋褐。一命到蓬邱。青袍春草色。白紵棄如仇。適會龍飛慶。王澤天下流。爾得六品階。無乃太爲優。凡登進士第。四選升校讐。歷官十五考。敍階與爾儔。如何志未滿。意欲凌雲遊。若言品位卑。寄書來我求。省之再三歎。不覺淚盈眸。吾家本寒素。門地寡公侯。先子有令德。樂道尙優游。生逢世多僻。委任信沈浮。仕宦不喜達。吏隱同莊周。積善有餘慶。清白爲貽謀。伊余奉家訓。孜孜務進修。夙夜事勤肅。言行思悔尤。出門擇交友。防慎畏薰蕕。省躬常懼玷。恐掇庭闈羞。童年志於學。不惰爲箕裘。二十中甲科。頰尾化爲蚪。三十入翰苑。步武向瀛州。四十登宰輔。貂冠侍冕旒。備位行一紀。將何助帝猷。旣非救旱雨。豈是濟川舟。天子未遐棄。日益素餐憂。黃河潤千里。草木皆浸漬。吾宗凡九人。繼踵昇官次。門內無白丁。森森朱綠紫。鷄行泊內職。亞尹州從事。府椽監省官。高低皆清美。悉由僥倖升。不因資考至。朝廷懸爵秩。命之曰公器。才者祿及身。功者賞於世。非才及非功。安得富厚利。寒衣內府帛。饑食太倉米。不蠶復不穉。未嘗勤四體。

雖然一家榮。豈塞衆人議。顛顛十日窺。齷齪千人指。借問爾與吾。如何不自媿。戒爾學立身。莫若先孝弟。怡怡奉親長。不敢生驕易。戰戰復兢兢。造次必於是。戒爾學干祿。莫若勤道藝。嘗聞諸格言。學而優則仕。不患人不知。惟患學不至。戒爾遠恥辱。恭則近乎禮。自卑而尊人。先彼而後已。相鼠與茅鷗。宜鑒詩人刺。戒爾勿曠放。曠放非端士。周孔垂名教。齊梁尙清議。南朝稱八達。千載穢青史。戒爾勿嗜酒。狂藥非佳味。能移謹厚性。化爲凶暴類。古今傾敗者。歷歷皆可記。戒爾勿多言。多言衆所忌。苟不慎樞機。災危從此始。是非毀譽間。適足爲身累。舉世重交遊。擬結金蘭契。忿怨從是生。風波當時起。所以君子心。汪汪淡如水。舉世好承奉。昂昂增意氣。不知承奉者。以爾爲玩戲。所以古人疾。籛籛與戚施。舉世重任俠。俗呼爲義士。爲人赴急難。往往陷刑死。所以馬援書。殷勤戒諸子。舉世賤清素。奉身好華侈。肥馬衣輕裘。揚揚過閭里。雖得市童憐。還爲識者鄙。我本羈旅臣。遭逢堯舜理。位重才不充。戚戚懷憂畏。深淵與薄冰。蹈之唯恐墜。爾曹當憫我。勿使增罪戾。閉門歛蹤跡。縮首避名勢。名勢不久居。畢竟何足恃。物盛必有衰。有隆還有替。速成不堅牢。亟走多顛躓。灼灼園中花。早發還先萎。遲遲澗畔松。鬱鬱含晚翠。賦命有疾徐。青雲難力致。寄語謝諸郎。躁進徒爲爾。

盧多遜

多遜。懷州河內人。周顯德中舉進士。累官集賢校理。遷左拾遺。集賢殿修撰。入宋。歷中書侍郎。

平章事坐事謫崖州。

蓉塘詩話多遜在朝行將歷代帝王年歷功臣事迹天下州郡圖誌理體事務沿革典故括成一百二十絕詩以備應對由是每所顧問無不知者以至踐清途登鈞席皆此力耳後山詩

話太祖夜幸後池對新月置酒召使賦詩請韻曰些子兒其詩云云太祖大喜盡以坐間飲食器賜之

新月應制

太液池邊看月時。好風吹動萬年枝。誰家玉匣開新鏡。露出清光些子兒。

呂端

端字易直幽州安次人以蔭補千牛備身仕周爲直史館歸宋同中書門下平章事諡文正

青箱

雜記李昉呂端同薦文館各登台輔呂公贈詩云云

贈李公

憶昔僦居明德坊。官資俱是校書郎。青衫共直昭文館。白首同登政事堂。佐國廟謨君已展。避賢榮路我猶妨。主恩至重何時報。老眼相看淚兩行。

送英公大師歸終南

衡岳烟蘿紫閣雲。名高湖外晚遊秦。清詞古學儒生業。圓笠方袍釋子身。竹杖拄歸山裏寺。篆書留與世間人。我疑簪組成爲縛。空仰吾師去路塵。

梁周翰

周翰字元褒管城人周廣順二年進士為太子中允入宋工部侍郎有集

禁林讌會

寶書驚絕耀天章飛白親題賜玉堂瑞彩上騰流素月朗河下注映丹牆鶴盤吳嶼雙翎健鵠顧雕陵巨翼長遊霧半收懸組練輕雲斜拂駐鸞皇墨池併獲三奇寶翠琰俱生五色光陪讌禁林知有幸叩頭遙祝萬年觴

曹翰

翰大名人周世宗時仕至德州刺史入宋歷威塞軍節度使卒諡武毅

青箱雜記曹翰嘗平江南有功後歸環衛數年不調一日

內宴賦詩翰以武人不豫乃自陳曰臣少亦學詩亦乞應詔太宗笑而許之曰卿武人宜以刀字為韻翰援筆立進太宗覽之惻然即自環衛驟遷數級

內宴奉詔作

三十年前學六韜英名常得豫時髦曾因國難披金甲不為家貧賣寶刀臂健尚嫌弓力軟眼明猶識陣雲高庭前昨夜秋風起羞睹盤花舊戰袍



# 全五代詩卷十六

周

劉兼

兼長安人。周末時。官榮州刺史。

胡震亨云。雲間朱氏得宋刻唐百家詩。兼集中有長春節詩。爲宋太祖誕日。蓋五代末人而入宋者。

貴遊

繡衣公子宴池塘。淑景融融萬卉芳。珠翠照天春未老。管絃臨水日初長。風飄柳線金成穗。雨洗梨花玉有香。醉後不能離綺席。擬憑青帝繫斜陽。

夢歸故園

桐葉飛霜落井欄。菱花藏雪助衰顏。夜窗颯颯搖寒竹。秋枕迢迢夢故山。臨水釣舟橫荻岸。隔溪禪侶啓柴關。覺來依舊三更月。離緒鄉心起萬端。

舊館秋寒夜夢長。水簾疎影入迴塘。宦情率爾拋魚艇。客恨依然在燕梁。白鷺獨飄山面雪。紅蕖全謝鏡心香。起來不語無人會。醉倚東軒半夕陽。

蜀都春晚感懷

蜀都春色漸離披。夢斷雲空事莫追。宮闕一城荒作草。王孫猶自醉如泥。誰家玉笛吹殘照。柳市金絲拂舊堤。可惜錦江無錦濯。海棠花下杜鵑啼。

對雨

幽庭凝碧亦漣漪。簷雷聲繁聒夢歸。半岫金烏纔委照。一川石燕又交飛。濯枝霰霏榴花吐。吹渚飄颻暑氣微。因憶故園閑釣處。蒼苔斑駁滿漁磯。

春霽

春霽江山似畫圖。醉垂鞭袂出康衢。猖狂亂打貍貅鼓。懶慢遲修鴛鴦書。老色漸來欺鬢髮。閑情將欲傲簪裾。苔錢遍地知多少。買得花枝不落無。

秋夕書懷

荒僻淹留歲已深。解龜無計恨艱任。守方半會蠻夷語。賀厦全忘燕雀心。夜靜倚樓悲月笛。秋寒欹枕泣霜砧。宦情總逐愁腸斷。一筴鱸魚直萬金。直氣從來不入時。掩關慵更釣磻溪。斯文未喪宣尼歎。吾道將窮阮籍悲。輕粉覆霜凝夜砌。亂金鋪菊織秋籬。南陽臥久無人問。薄命非才有可疑。

春宵

春雲春日共朦朧。滿院梨花半夜風。宿酒未醒珠箔捲。豔歌初闋玉樓空。五湖范蠡才堪重。六印蘇秦道

不同。再取秦琴聊假寐。南柯靈夢莫相通。

秋夕書懷呈戎州郎中

素律初迴枕簟涼。松風飄泊入華堂。譚雞寂默紗窗靜。夢蝶蕭條玉漏長。歸去水雲多阻隔。別來情緒足悲傷。霜砧月笛休相引。只有離襟淚兩行。風送秋荷滿鼻香。竹聲敲玉近虛廊。夢迴故國情方黯。月過疎簾夜正涼。菱鏡也知移豔態。錦書其柰隔年光。鸞膠處處難尋覓。斷盡相思寸寸腸。

晚樓寓懷

薄暮疎林宿鳥還。倚樓垂袂復憑欄。月沈江底珠輪淨。雲鎖峰頭玉葉寒。劉毅暫貧雖壯志。馮唐將老自低顏。無言獨對秋風立。擬把朝簪換釣竿。

征婦怨

金閨寂寞罷妝臺。玉筯闌干界粉腮。花落掩關春欲暮。月圓欹枕夢初迴。鸞膠豈續愁腸斷。龍劍難揮別緒開。曾寄錦書無限意。塞鴻何事不歸來。

對鏡

青鏡重磨照白鬢。白鬢閑撚意何如。故園迢遞千山外。荒郡淹留四載餘。風送竹聲侵枕簟。月移花影過庭除。秋霜滿領難消釋。莫讀離騷失意書。

春燕

多時窗外語呢喃。只要佳人捲繡簾。大廈已成須慶賀。高門頻入莫憎嫌。花間舞蝶和香趁。江畔春泥帶雨銜。栖息數年情已厚。營巢爭肯傍他簷。

春晚寓懷

一承兌澤蒞方州。八度春光照郡樓。好景幾將官吏醉。名山時領管絃遊。空花任爾頻侵眼。老雪從他漸滿頭。歸去杜陵池閣在。只能歡笑不能愁。

中春宴遊

二月風光似洞天。紅英翠萼簇芳筵。楚王雲雨迷巫峽。江令文章媚蜀箋。歌黛入顰春岫斂。舞衣新繡曉霞鮮。酒闌香袂初分散。笑指漁翁釣暮烟。

春晚閑望

東風滿地是梨花。只把琴心殢酒家。立處晚樓吹短笛。望中春草接平沙。雁行斷續晴天遠。燕翼參差翠幕斜。歸計未成頭欲白。釣舟烟浪思無涯。

秋夕書事

搖落江天萬木空。雁行斜戛塞垣風。征閨擣月離愁遠。舊館眠雲旅夢通。郢客豈能陪下里。臯禽爭肯戀樊籠。此心曠蕩誰相會。盡在南華十卷中。

蓮塘霽望

新秋菡萏發紅英。向晚風飄滿郡馨。萬疊水紋羅乍展。一雙鸕鶿繡初成。採蓮女散吳歌闋。拾翠人歸楚雨晴。遠岸牧童吹短笛。蓼花深處信牛行。

送從弟舍人入蜀

嘉陵江畔餞行車。離袂難分十里餘。慷慨莫誇心似鐵。留連不覺淚成珠。風光川谷梅將發。音信雲天雁未疎。立馬舉鞭無限意。會稀別遠擬何如。

新迴車院筵上作

迴車院子未迴車。三載疲民詠袴襦。借寇已承英主詔。乞骸須上老臣書。黃金蜀柳籠朱戶。碧玉湘筠映綺疏。因問滿筵詩酒客。錦江何處有鱸魚。

寄長安鄭員外

屈指良交十四人。隙駒風燭漸爲塵。當初花下三秦客。只有天涯二老身。乘醉幾同遊北內。尋芳多共謁東隣。此時阻隔關山遠。月滿江樓淚滿巾。

咸陽懷古

高秋咸鎬起霜風。秦漢荒陵樹葉紅。七國鬪雞方賈勇。中原逐鹿更爭雄。南山漠漠雲常在。渭水悠悠事旋空。立馬舉鞭遙望處。阿房遺址夕陽東。

春怨

繡林紅岸落花鈿。故去新來感自然。絕塞杪春悲漢月。長林深夜泣絃弦。錦書雁斷音難寄。菱鏡鸞孤貌可憐。獨倚畫屏人不會。夢魂纔別戍樓邊。

登樓寓望

憑高多是偶洑瀾。紅葉何堪照病顏。萬疊雲山供遠恨。一軒風物送秋寒。背琴鶴客歸松徑。橫笛牛童臥蓼灘。獨倚郡樓無限意。夕陽西去水東還。

江岸獨步

醉卓寒筇傍水行。漁翁不會獨吟情。龜能顧印誰相重。鶴偶乘軒不可輕。簪組百年終長物。文章千古亦虛名。是非得喪皆閑事。休向南柯與夢爭。

江樓望鄉寄內

獨上江樓望故鄉。淚襟霜笛共淒涼。雲生隴首秋雖早。月在天心夜已長。魂夢只能隨蛺蝶。烟波無計學鴛鴦。蜀箋都有三千幅。總寫離情寄孟光。

命妓不至

琴中難挑孰憐才。獨對良宵酒數杯。蘇子黑貂將已盡。宋宏青鳥又空回。月穿淨牖霜成隙。風捲殘花錦作堆。欹枕夢魂何處去。醉和春色入天台。

宣賜錦袍設上贈諸郡客

十月芙蓉花滿枝。天庭驛騎賜寒衣。將同玉蝶侵肌冷。也遣金鵬遍體飛。夜臥始知多忝竊。晝行方覺轉光輝。深冬若得朝丹闕。太華峰前衣錦歸。

晨雞

朱冠金距綵毛身。昧爽高聲已報晨。作瑞莫慚先貢楚。擅場須信獨推秦。淮南也伴升仙犬。函谷曾容借曉人。此日卑棲隨飲啄。宰君驅我亦相馴。

芳春

微雨微風隔畫簾。金爐檀炷冷慵添。桃花滿地春牢落。柳絮成堆雪棄嫌。寶瑟不能邀卓氏。綵毫何必夢江淹。宦情歸興休相撓。隼旆漁舟總未厭。

春遊

搖搖離緒不能持。滿郡花開酒熟時。羞聽黃鶯求善友。強隨綠柳展愁眉。隔雲故國山千疊。傍水芳林錦萬枝。聖主未容歸北闕。且將勤儉撫南夷。

重陽感懷

重陽不忍上高樓。寒菊年年照暮秋。萬疊故山雲總隔。兩行鄉淚血和流。黃茅莽莽連邊郡。紅葉紛紛落釣舟。歸計未成年漸老。茱萸羞戴雪霜頭。

載花乘酒上高山。四望秋空八極寬。蜀國江山存不得。劉家豚犬取何難。張儀舊壁蒼苔厚。葛亮荒祠古木寒。獨對斜陽更惆悵。錦江東注似波瀾。

宴遊池館

綺筵金碧照芳菲。酒滿瑤卮水滿池。去歲南岐離郡日。今春東蜀看花時。儉蓮發臉當籌箸。緒柳生腰按柘枝。座客半酣言笑狎。孔融懷抱正怡怡。

寄高書記

齊朝慶裔祖敖曹。麟角無雙鳳九毛。聲價五侯爭辟命。文章一代振風騷。醉琴自寄陶家意。夢枕誰聽益郡刀。補袞應星曾奏舉。北山南海孰爲高。

再見從弟舍人

屈指依稀十五年。鸞臺祕閣位相懸。分飛淮甸雁行斷。重見江樓蟾影圓。滯跡未偕朝北闕。高才方命入西川。願君通理須還早。拜慶慈親几杖前。

春晝醉眠

朱欄芳草綠纖纖。欹枕高堂捲畫簾。處處落花春寂寂。時時中酒病恹恹。塞鴻信斷雖堪訝。梁燕詞多且莫嫌。自有卷書銷永日。霜華未用鬢邊添。

春夕寓興

忘憂何必在庭萱。是事悠悠竟可寬。酒痛未能辭錦里。春狂又擬入桃源。風吹楊柳絲千縷。月照梨花雪萬團。閑泥金徽度芳夕。幽泉石上自潺湲。

訪飲妓不遇招酒徒不至

小橋流水接平沙。何處行雲不在家。畢卓未來輕竹葉。劉晨重到殢桃花。琴樽冷落春將盡。幃幌蕭條日又斜。回首卻尋芳草路。金鞍拂柳思無涯。

春宴河亭

柳擺輕絲拂嫩黃。檻前流水滿池塘。一筵金翠臨芳岸。四面烟花出粉牆。舞袖逐風翻繡浪。歌塵隨燕下雕梁。蠻箋象管休凝思。且放春心入醉鄉。

蜀都道中

劍關雲棧亂崢嶸。得喪何由險與平。千載龜城終失守。一堆鬼錄漫留名。季年必不延昏主。薄賞那堪激懦兵。李特後來多二世。納降歸擬盡公卿。

萬葛樹

葉如羽蓋豈堪論。百步清陰鎖綠雲。善政已聞思召伯。英風偏稱號將軍。靜鋪講席麟經潤。高拂闕枝兔影分。更有歲寒霜雪操。莫將樗櫟擬相羣。

春夕遣懷

窮通分定莫淒涼。且放歡情入醉鄉。范蠡扁舟終去國。馮唐半世只爲郎。風飄玉笛梅初落。酒汎金樽月未央。休把虛名撓懷抱。九原邱隴盡侯王。

新蟬

齊女屏幃失舊容。侍中冠冕有芳蹤。翅翻晚鬢尋香露。聲引秋絲逐遠風。旅館聽時髭欲白。戍樓聞處葉多紅。只知送恨添愁事。誰見凌霄羽蛻功。

寄滑州文秀大師

分飛屈指十三年。菡萏峰前別社蓮。薄宦偶然來左蜀。孤雲何事在南燕。一封瑤簡音初達。兩處金沙色共圓。珍重湯休惠佳句。郡齋吟久不成眠。

中春登樓

金杯不似滌愁腸。江郡芳時憶故鄉。兩岸烟花春富貴。一樓風月夜淒涼。王章莫恥牛衣淚。潘岳休驚鶴鬢霜。歸去蓮花歸未得。白雲深處有茅堂。

古今通塞莫咨嗟。謾把霜髯敵歲華。失手已慙蛇有足。用心休爲鼠無牙。九天雲淨方憐月。一夜風高便厭花。獨倚郡樓人不會。釣舟春浪接平沙。

自遣

未上亨衢獨醉吟。賦成無處博黃金。家人莫問張儀舌。國士須知豫讓心。照乘始堪沽善價。陽春爭忍混

凡音。鷓鴣鱗翼途程在。九萬風雲海浪深。

偶有下殤因而自遣

彭壽殤齡共兩空。幻泡緣影夢魂中。缺圓宿會長如月。飄忽浮生疾似風。修短百年先後定。賢愚千古是非同。南柯太守知人意。休問陶陶塞上翁。

倦學

樂廣亡來冰鏡稀。宓妃嫫母混妍媸。且於霧裏藏元豹。休向窗中問碧雞。百氏典墳空自苦。一堆螢雪竟誰知。門前春色芳如畫。好掩書齋任所之。

去年今日

去年今日到榮州。五騎紅塵入郡樓。貔虎只知迎太守。蠻夷不信是儒流。姦豪已息時將泰。疲瘵全蘇歲又周。聖主若容辭重祿。便歸烟水狎羣鷗。

晝寢

花落青苔錦數重。書淫不覺避春慵。恐倩枕上飛莊蝶。任爾雲間騁陸龍。玉液未能消氣魄。牙籤方可滌昏蒙。起來已被詩魔引。窗外寒敲翠竹風。

郡齋寓興

依約樊川似旭川。郡齋風物盡蕭然。秋庭碧蘚鋪雲錦。晚閣紅蕖簇水仙。醉筆語狂揮粉壁。歌梁塵亂拂

花鈿情懷放蕩無羈束。地角天涯亦信緣。

郡樓閑望書懷

郡樓樓閣繞江濱。風物清秋入望頻。銅鼓祭龍雲塞廟。蘆花飄鷺雪粘人。蓮披淨沼羣香散。鷺點寒烟玉片新。歸去杜陵池館在。且將朝服拂埃塵。

玉燭花

嫋嫋香英三四枝。亭亭紅豔照階墀。正當晚檻初開處。卻似春闈就試時。少女不吹方熠爚。東君偏惜未離披。夜深斜倚朱欄外。擬把隣光借與誰。

從弟舍人惠茶

曾求芳茗貢蕪詞。果沐頒霑味甚奇。龜背起紋輕炙處。雲頭翻液乍烹時。老丞倦悶偏宜矣。舊客過從別有之。珍重宗親相寄惠。水亭山閣自攜持。

再看光福寺牡丹

去年曾看牡丹花。蛺蝶迎人傍彩霞。今日再遊光福寺。春風吹我入仙家。當筵芬馥歌唇動。倚檻嬌羞醉眼斜。來歲未朝金闕去。依前和露載歸衙。

海棠花

淡淡微紅色不深。依依偏得似春心。烟輕統國顰歌黛。露重長門斂淚衿。低傍繡簾人易折。密藏香葉蝶

難尋良宵更有多情處。月下芬芳伴醉吟。

新竹

近窗臥砌兩三叢。佐靜添幽別有功。影鏤碎金初透月。聲敲寒玉乍搖風。無憑費叟烟波碧。莫信湘妃淚點紅。自是子猷偏愛爾。虛心高節雪霜中。

木芙蓉

素靈失律詐風流。強把芳菲半載偷。是葉葳蕤霜照夜。此花爛熳火燒秋。謝蓮色淡爭堪種。陶菊香穠亦合羞。誰道金風能肅物。因何厚薄不相侔。

送二郎君歸長安

我兒辭去淚雙流。蜀郡秦川兩處愁。紅葉滿山歸故國。黃茅徧地住他州。荷衣曉挂慙官吏。菱鏡秋窺訝鬢髩。好向雲泉營舊隱。莫教莊叟畏犧牛。

送文英大師

屈指平陽別社蓮。蟾光一百度曾圓。孤雲自在知何處。薄宦參差亦信緣。山郡披風方穆若。花時分袂更淒然。搖鞭相送嘉陵岸。回首羣峰隔翠烟。

酬勾評事

閑庭欹枕正悲秋。忽覺新編浣遠愁。才薄只愁安雁戶。

夷人內有雁戶。蓋徙移不定之故也。

年高空憶復漁舟。鷺翹皓雪臨汀

岸。蓮嫋紅香匝郡樓。對景卻慙無藻思。南金荆玉卒難酬。

初至郡界

嘉陵江畔接榮川。兩畔旌旗下瀨船。郡印已分炎瘴地。朝衣猶惹御爐烟。蓮塘小飲香隨艇。月榭高吟水壓天。錦字莫嫌歸路遠。華夷一統太平年。

到郡後有寄

蜀路新修盡坦平。交親深幸再逢迎。正當返袂思鄉國。卻似歸家見弟兄。霑澤只慙堯綽重。沂流還喜范舟輕。欲將感戀裁書旨。多少魚箋寫得成。

長春節

聖朝佳節遇長春。跪捧金爐祝又焚。寶藏發來天地秀。兵戈銷後帝皇尊。太平基址千年永。混一車書萬古存。更有馨香滿芳檻。和風遲日在蘭蓀。

登郡樓書事

偶奉綸書蒞旭川。郡樓嘉致盡依然。松欹烏道雲藏寺。月滿漁舟水浸天。望帝古祠花簇簇。錦城歸路草芊芊。有時倚檻垂雙袂。故國風光似眼前。

旭川祁宰思家而卒因述意呈秦川知己

歲稔民康絕訟論。政成公暇自由身。朝看五馬閑如社。夜擁雙姬煖以春。家計不憂憑冢子。官資無愧是朝臣。豈同齷齪祁員外。至死悲涼一婦人。

登郡樓書懷

烟雨樓臺漸晦冥。錦江澄碧浪花平。卞和未雪荆山恥。莊鳥空傷越國情。天際寂寥無雁下。雲端依約有僧行。登高欲繼離騷詠。魂斷愁深寫不成。

邊郡荒涼悲且歌。故園迢遞隔烟波。琴聲背俗終如是。劍氣衝星又若何。朝客漸通書信少。釣舟頻引夢魂多。北山更有移文者。白首無塵歸去麼。

莫嗔阮氏哭途窮。萬代深沈恨亦同。瑞玉豈知將抵鵠。鉛刀何事卻屠龍。九夷欲適嗟吾道。五柳終歸效古風。獨倚郡樓無限意。滿江烟雨正冥濛。

偶聞官吏舉請輒有一篇寄從弟舍人

官吏潛陳借寇詞。宦情鄉夢兩相違。青城錦水無心住。紫閣蓮峰有意歸。張翰鱸魚因醉憶。孟光書信近春稀。黃茅瘴色看看起。貪者猶疑別是機。

誠是非

巧舌如簧總莫聽。是非多自愛憎生。三人告母雖投杼。百犬聞風只吠聲。辨玉且寬和氏罪。誣金須認不

疑情因思疇昔遊談者。六國交馳亦受烹。

簡豎儒

蹄涔豈信有滄浪。螢火何堪並太陽。淵奧未曾探禹穴。矜誇更擬越邱墻。小巫神氣終須怯。下里音聲必  
不長。近日冰壺多晦昧。虎皮羊質也觀光。

貽諸學童

橫經叉手步還趨。積善方知慶有餘。五箇小雛離學院。一行新雁入貧居。攘羊告罪言何直。舐犢牽情理  
豈虛。勸爾立身須苦志。月中丹桂自扶疎。

春夜

薄薄春雲籠皓月。杏花滿地堆香雪。醉垂羅袂倚朱欄。小數玉仙歌未闕。

春遊

柳成金穗草如茵。載酒尋花共賞春。先入醉鄉君莫問。十年風景在三秦。

中夏晝臥

寂寂無憀九夏中。傍簷依壁待清風。壯圖奇策無人問。不及南陽一臥龍。

西齋

西齋新竹兩三莖。也有風敲碎玉聲。莫恨移來欄檻遠。譬如元本此間生。

# 全五代詩卷十七

周

胡宿

宿周末人

調元按宋天聖初亦有胡宿字武平晉陵人登第拜樞密副使知杭州以太子少卿致仕與此胡宿應是兩人而後人訛爲一人以爲五代末入宋者然不應相隔如是之遠姑就五代末之說附于周以俟考

彭山贈貫之

彭山隔重湖。落日見孤塔。揚舲入空曠。烟樹散鵝鴨。山中老臞仙。萬頃織芥納。乘風落珠唾。暝色遠相答。平生爾汝分。磁鐵契已狎。萬緣一笑空。箇處無剩法。方舟過谷隱。風雨寒雲霧。黎明帶星歸。尙及齋鼓踏。臨歧戒後會。梅熟新秧插。期我散縑楮。莫忘鷗盟歃。

送楊中允宰常熟

丹舸傍江潯。嘔啞遠鷓音。新科持片玉。能政引孤琴。美進宮坊秩。榮歸里閭心。名參天下雋。歌著邑中黔。地志連香徑。家園帶武林。吳山幾屏秀。楚水一篙深。晚鼓停餘疊。秋帆臥半陰。平時接方驥。後夜望橫參。陶菊何妨醉。江毫且剩吟。悠悠河上別。千里鬱朋簪。

送顯忠上人歸吳郡

秋風隨處起。振錫不留行。卻背嵩雲去。迎看淮月生。禪通少林默。詩杼小山清。幾夕巖窗下。忘眠聽瀑聲。

太湖石

海岱鉛松妄得名。洞庭山腳失寒瓊。漱成一朵孤雲勢。費盡千年白浪聲。誰向機邊逢織女。直疑巖下見初平。年來賞物多成病。日遶蒼苔幾徧行。

宿秀峯寺

夕鐘初斷海鯨音。投宿香園半翠岑。冰簟浸牀消客夢。水簾澄月伴僧吟。雄風拂衽清涼極。珍樹交柯翠翳深。一夜漢陰機事息。草堂虛論破煩襟。

過桐廬

兩岸山花中有溪。山花紅白徧高低。靈源忽若乘槎到。仙洞還同採藥迷。二月辛夷猶未落。五更鴉臼最先啼。茶烟漁火遙堪畫。一片人家在水西。

塞上

漢家神箭定天山。烟火相望萬里間。契利請盟金七酒。將軍歸臥玉門關。雲沉老上妖氛斷。雪照回中探騎閑。五餌已行王道勝。絕無刁斗至闐顏。

飛將

曾從嫖姚立戰功。胡雛猶畏紫鬚翁。雕戈夜統千廬會。緹騎秋收五柞宮。後殿拜恩金印重。北堂開宴玉

壺空從來敵國威名大。麾下多稱黑稍公。

次韻朱沈春雨之什

蒼野迷雲黯不歸。遠風吹雨入巖扉。石牀潤極琴絲緩。水閣寒多酒力微。夕夢將成還滴滴。春心欲斷正霏霏。憂花惜月長如此。爭得東陽病骨肥。

淮南王

貪鑄金錢盜寫符。何曾七國戒前車。長生不待爐中藥。鴻寶誰收篋內書。碧井牀空天影在。小山人去桂叢疎。雲中雞犬無消息。麥秀漸漸徧故墟。

早夏

井輞投多思不禁。密垂珠箔晝沈沈。睡驚燕語頻移枕。病起蛛絲半在琴。雨徑亂花埋宿豔。月軒修竹轉涼陰。一春酒費知多少。探盡囊中換賦金。

芙蓉湖

小湖香豔戰芙蓉。碧葉田田擁釣篷。嵐氣欲飛山隔斷。秋光不定水遙空。翩躚雪鳥爭投浦。潑刺霜鱗對擲風。正是滄浪濯纓日。一竿多謝紫溪翁。

函谷關

天開函谷壯關中。萬古驚塵向此空。望氣竟能知老子。棄繻何不識終童。謾持白馬先生論。未抵鳴雞下

客功符命已歸如掌地。一丸曾誤隗生東。

津亭

津亭歌闋戒棠舟。五兩風來不暫留。西北浮雲連魏闕。東南初日滿秦樓。層城渺渺人傷別。芳草萋萋客倦遊。平樂舊懽收不得。更憑飛夢到瀛洲。

沖虛觀

五粒青松護翠苔。石門岑寂斷纖埃。水浮花片知仙路。風遞鸞聲認嘯臺。桐井曉寒千乳斂。茗園春嫩一旗開。馳烟未勒山亭字。可是英靈許再來。

淮南發運趙邢州被詔歸闕

天臺封詔紫泥馨。馬首前瞻北斗城。人在函關先望氣。帝於京兆最知名。一區東第趨晨近。數刻西廂接晝榮。正是兩宮裁化日。百金雙壁拜虞卿。

憶薦福寺牡丹

十日春風隔翠岑。祗因繁朵自成陰。尊前可要人頽玉。樹底遙知地側金。花界三千春渺渺。銅搬十二夜沈沈。雕盤分簋何由得。空作西州擁鼻吟。

古別

長安何年祖軼休。風帆不斷岳陽樓。佳人挾瑟漳河曉。壯士悲歌易水秋。九帳清油徒自負。百壺芳醕豈

消憂。至今長樂坡前水。不啻秦人怨隴頭。

寄昭潭王中立

高弦一弄武陵深。六幘天空萬里心。吳苑歌驪成□□。楚峰回雁好歸音。十千美酒花期隔。三百枯棋弈□□。莫上孤城頻送目。浮雲西北是家林。

雪

屏翳驅雲結夜陰。素花飄墜惡氛沈。色欺曹國麻衣白。寒入荆王翠被深。天上明河銀作水。海中仙樹玉爲□。日高獨擁鸛裘臥。誰乞長安取酒金。

天街曉望

長樂才聞一叩鐘。百官初謁未央宮。金波穆穆沙隄月。玉樹瑤瑤上苑風。香重椒蘭橫結霧。氣寒龍虎遠浮空。嗟余索米無人問。行避霜臺御史驄。

趙宗道歸輦下

汾牒相逢楚水湄。竹林文酒此攀嵇。半甔未暖還傷別。一臂初交又解攜。江浦嘔啞風送櫂。河橋勃率柳垂隄。明年四月秦關到。洗眼揚州看馬啼。

感舊

千里青雲未致身。馬蹄空踏幾年塵。曾迷玉洞花光老。欲過金城柳眼新。粉壁已沈題鳳字。酒壚猶記姓

黃人塢中橫笛偏多感。一涕闌干白角巾。

城南

昨夜輕陰結夕霏。城南十里有香泥。初聞山鳥驚新雨。遙見林花識舊蹊。蕩槳遠從芳草渡。墊巾還傍綠楊隄。羅敷正苦桑蠶事。惆悵南來五馬蹄。

侯家

洞戶春遲漏箭長。短轅初返雒陽傍。綵雲按曲青岑醴。沈水薰衣白璧堂。前檻蘭苕依玉樹。後園桐葉護銀牀。宴殘紅燭長庚爛。還促朝珂謁未央。

殘花

雨壓殘紅一夜凋。曉來簾外正飄搖。數枝翠葉空□□。萬片香魂不可招。長樂夢回春寂寂。武陵人去水□□。愁將玉笛傳遺恨。苦被芳風透綺寮。

次韻徐爽見寄

五兩青絲帝渥深。平時何敢嘆英沈。侏儒自是長□□。澣統都來直數金。寂寞死灰人喪偶。婆娑生意樹□□。年來想見瓊枝色。久夢蘧蘧到竹林。

李九齡

九齡周末人。

贈馬道士

水共逍遙雲共孤。混時言笑只佯愚。經年但醉宜城酒。千里唯擔華嶽圖。尋野鶴來空碧洞。覓琴僧去渡重湖。人間再見知何日。乞取先生石轆轤。

贈譚先生

古觀重重繞翠微。松杉深處掩雙扉。雲生萬壑投龍去。海隔三山放鶴歸。花洞宴遊春日永。石壇朝禮曙星稀。每聽高論長生理。擬向寰中便拂衣。

上清辭五首

入海浮生汗漫秋。紫皇高宴五雲樓。霓裳曲罷天風起。吹散仙香滿十洲。樓鑱彤霞地絕塵。碧桃花發九天春。東皇近日慵遊宴。閑煞瑤池五色麟。上清仙路有丹梯。影響行人到即迷。不會無端箇漁父。阿誰教入武陵溪。本來方朔是真仙。偶別丹臺未得還。何事玉皇消息晚。忍教顛顛向人間。新拜天官上玉都。紫皇親授五靈符。羣仙箇箇來相問。人世風光似此無。

讀三國志

有國由來在得賢。莫言興廢是循環。武侯星落周瑜死。平蜀降吳似等閑。

山舍南溪小桃花

一樹繁英奪眼紅。開時先合占東風。可憐地僻無人賞。拋擲深山亂木中。

春行遇雨

夾路輕風撼柳條。雨侵春態動無憀。採香陌上誰家女。溼損釵頭翡翠翹。

登樓寄遠

滿城春色花如雪。極目烟光月似鉤。總是動人鄉思處。更堪容易上高樓。

望思臺

漢武年高慢帝圖。任人曾不問賢愚。直饒四老依前出。消得江充寵佞無。

山舍偶題

門掩松蘿一逕深。偶攜藜杖出前林。誰知盡日看山坐。萬古興亡總在心。

荆溪夜泊

點點漁燈照浪清。水烟疎碧月朧明。小灘驚起鴛鴦處。一隻採蓮船過聲。

旅舍臥病

家隔西秦無遠信。身隨東洛度流年。病來旅館誰相問。牢落閑庭一樹蟬。

代邊將

雪凍陰河半夜風。戰回狂虜血漂紅。據鞍遙指長安路。須刻麟臺第一功。

夜與張舒話別

愁聽南樓角又吹。曉雞啼後更分離。如何銷得淒涼思。更勸燈前酒一卮。

寒梅詞

霜梅先拆嶺頭枝。萬卉千花凍不知。留得和羹滋味在。任他風雪苦相欺。

題靈泉寺

入谷先生一陣香。異花奇木簇禪堂。可憐門外高低路。萬轂千蹄日日忙。

宿張正字別業

茅屋蕭寥烟暗後。松窗寂歷月明初。此時誰念孤吟客。唯有黃公一帙書。

鶴

天上瑤池覆五雲。玉麟金鳳好爲羣。不須更飲□□□。直是清流也汗君。

登昭福寺樓

旅懷秋興正無涯。獨倚危樓四望賒。各變□□□□□。滿川空有舊烟霞。

過相思谷

悠悠信馬春山曲。芳草和烟鋪嫩綠。正被離愁著莫人。那堪更過相思谷。

寫莊子

聖澤安排當散地。賢侯優貸借新居。閑中亦相閑生計。寫得南華一部書。

山中寄友人

亂雲堆裏結茅廬。已共紅塵跡漸疎。莫問野人生計事。窗前流水枕前書。

杜常

常周末人。

華清宮

行盡江南數十程。曉星殘月入華清。朝元閣上西風急。都入長楊作雨聲。

滕白

白五代末人。官郎中。歷臺省。有工部集。

題文川村居

種茶巖接紅霞塢。灌稻泉生白石根。皤腹老翁眉似雪。海棠花下戲兒孫。

李花開

花開周伶人。

五代詩話。李相穀嘗爲陳州防禦。謁夫子廟。見像在破屋中。歎息久之。伶人李花開趨進。獻口號云。

口號

破落三間屋。蕭條一旅人。不知負何事。生死厄于陳。

梁補闕

補闕周時人。

南部新書。米都知者。伶人也。善騷雅。有道之士。故西樞王公朴嘗愛其警策云。小旂村店酒。微雨野塘花。梁補闕有贈詩云云。玉壺清話。李度顯德中舉進士。工詩。有醉輕浮世事。老重故鄉人之句。多誦之王

朴為樞密。止以此一聯。千申文炳。文炳知舉。遂擢為第三人。嘲曰。主司只誦一聯詩。附見于此。

贈米都知

供奉三朝四十年。聖時流落髮衰殘。貪將樂府歌明代。不把清吟換好官。

陳搏

搏字圖南。自號扶搖子。亳州真源人。後唐長興中。舉進士不第。隱居華山雲臺觀。年近百歲。周

世宗召至闕下。賜號白雲先生。放還山。入宋。賜號希夷。化形于張超谷。有高陽集。釣潭集。

聞見前錄。

華山隱士陳圖南。游四方。有大志。隱武當山。詩云。他年南北去。記得此山名。本朝張鄧公。改南北為南嶽。題其後云。蘇壁題詩。志何人。可憐今老華圖南。蓋唐末時詩也。談苑。陳搏。譙郡真源人。與老聃同鄉里。嘗舉進士不第。去隱武當山。九室岩。辟穀鍊氣。作詩八十一章。號指工局。言修養之事。宋事實類苑。華陽隱士李奇。自言開元中。郎官。年過百歲。呂洞賓有劍術。百餘歲。面如嬰兒。皆嘗至其齋中。嘗以朱書寫紙。令小僮持寄搏。搏與酬和。老學菴筆記。邛州天慶觀有希夷石刻云。

因奉攀縣尹尙書水南小酌回特叩松屨謁高公茶話移時偶書二十八字道門弟子圖南上詩云我謂浮榮真是幻醉來捨轡謁高公因聆元虛冥冥理轉覺塵寰一夢中末書太歲丁酉蓋蜀孟昶時當晉天福中其後有文與可跋云高公者此觀都威儀何昌一也希夷從之學鎖鼻法翰府名談陳希夷先生每睡則半載或數月近亦不下月餘贈金勵睡詩云云玉堂信話陳希夷有詩云我見世人忙箇箇忙如火忙者不爲身爲身忙卻可鄧伯溫易學辨惑陳搏負經綸才五季亂離游行四方志不遂入武當山後隱居華山自晉漢以後每聞一朝革命輦輿數日人有問者瞑目不答一日方乘驢遊華陰時聞太祖登極驚喜大笑問其故又笑曰天下自此定矣太祖方龍潛時搏嘗曰天日之表知太平之有自矣遜迹之初有詩云十年蹤跡走紅塵云云豈淺也五代史補陳搏能爲詩隱居華山世宗召到闕下拜左拾遺搏不就堅乞歸山世宗許之未幾賜之書勅陳搏朕以汝高謝人寰栖心物外養太浩自然之氣應少徵處士之星既不屈於王侯遂隱居於岩壑樂我中和之化慶乎下武之期而能遠涉山涂暫來城闕浹旬延遇宏益居多白雲暫駐於帝鄉好爵難縻於達士昔堯唐之至聖有巢許爲外臣朕雖寡薄庶遵前鑒恐山中所闕已令華州刺史每事供須乍反故山履茲春序緬懷高尚當適所宜故茲撫問想宜安悉卽陶穀之詞也初搏之被召嘗爲詩一章有草澤吾皇詔云云好事者欣然謂之答詔詩青瑣集先生後歸華陰縣令王睦欲爲之起寢于溪岩先生爲詩曰華山高處是吾宮云云睦得詩愧謝古今詩話張忠定公少謁華山陳圖南圖南贈詩一絕云自吳入蜀是尋常歌舞筵中救火忙乞得金陵養閑散也須多謝鬢邊瘡始皆不喻其意後忠定更鎮杭益晚年發瘡于鬢移守金陵遂薨悉如其言唐宋遺史成都妓人單氏贈陳希夷詩云帝王師不得日月老應難名士多稱之

西峯

爲愛西峯好吟頭盡日昂巖花紅作陣溪水綠成行幾夜礙新月半山無夕陽寄言嘉遯客此處是仙鄉

辭上歸隱詩

草澤吾皇詔。圖南搏姓陳。三峯千載客。四海一閑人。世態從來薄。詩情自得真。乞全麋鹿性。何處不稱臣。

贈金勵睡詩二首

常人無所重。惟睡乃爲重。舉世皆爲息。魂離神不動。覺來無所知。貪求心愈動。堪笑塵中人。不知夢是夢。至人本無夢。其夢本游仙。真人本無睡。睡則浮雲烟。爐裏近爲藥。壺中別有天。欲知睡夢裏。人間第一元。

歸隱

十年蹤跡走紅塵。回首青山入夢頻。紫陌縱遊爭及睡。朱門雖富不如貧。愁聞劍戟扶危主。悶聽笙歌聒醉人。攜取琴書歸舊隱。野花啼鳥一般春。

冬日晚望

山鬼煖或呼。溪魚寒不跳。晚景愈堪觀。危峯露殘照。

與毛女游

藥苗不滿筥。又更上危巔。回指歸去路。相將入翠烟。

題石水澗

銀河灑落翠光冷。一派回環湛晚暉。幾恨卻爲頑石礙。琉璃滑處玉花飛。

華山

半夜天香入岩谷。西風吹落嶺頭蓮。空愛掌痕侵碧漢。無人曾嘆巨靈仙。

與毛女游

曾析松枝爲寶櫛。又編栗葉作羅襦。有時問著秦宮景。笑撚仙花望太虛。

謝華陰令

華山高處是吾宮。出即凌空跨晚風。臺殿不將金鎖閉。來時自有白雲封。

齊州人

歌 周顯德中齊州有人病狂。每歌云云。自言夢見一紅衣女子。引入宮殿。皆紅。一小姑令歌云。玉靈華蓋曉玲瓏。天府由來汝府中。惆悵口口言不盡。一丸蘿蔔火吾宮。有道士曰。此犯大麥毒所致。女即心神。小姑脾神也。豎經蘿蔔治麪毒。如此言以

藥并蘿蔔

食遂愈

踏陽春。人間三月雨和塵。陽春踏盡秋風起。腸斷人間白髮人。

章江書生

詩

全唐詩話。金陵陳省躬。顯德中爲臨川宰。舟經章江。泊女兒浦。抵暮。有書生不通姓名。登舟求見。與省躬論語甚奇。問今晉朝第幾帝。省躬皆實對。微笑而已。生間高吟一詩。省躬疑是神仙。再拜叩問。終無言。出船不見所之。

西去長沙東上船。思量此事已千年。長春殿掩無人掃。滿眼梨花哭杜鵑。

馮暉

答妻

暉與周太祖相善。微時與太祖就一道士刺雕。以臍作爨。中作雁數隻。太祖項上作雀及穀。戒曰。爾曹自愛。雀銜穀。雁出矣。是爾曹通顯時也。後太祖登位。暉秉旄。所刺皆驗。先是暉嘗遇寒食。妻嘗曰。節到矣。如何辦得。暉捫腹云云。

休說辦不辦。且看瓮裏飛出雁。

僧緘

示王處厚

緘。大中進士。削髮修道。至後周顯德中。猶在。僞蜀舉子王處厚嘗叩之。言其必捷。但泰山舉為司命。當食。幽府祿。留四句示之。後成名者八士。內處厚與王慎言策名為二王。而一百二十日後。處厚竟亡。皆驗焉。

周士同成。二王殊名。王居一焉。百日為程。

度世古元歌

後周至真觀小變橋下掘得石碑。刻度世古元歌云云。

始青之下月與日。兩半同升合為一。大如彈丸甘如密。子若得之慎勿失。

顯德道宮石記

顯德中。世宗嘗營一道宮於皇城之西。工人發得石一片。上有字云云。後題道士守真記。帝讀之歎異。

瑞雲靈跡鎮梁東。他日多應與古同。歲月遷移人事改。再來閑處又興功。

漣水古冢餅文

周顯德乙卯歲。僞漣水軍使秦進崇修城。發一古冢。棺槨皆腐。得一餅。中更有一餅。黃質黑文。成隸字云云。其明年。周師伐吳。進崇死之。

一雙青烏子。飛來五兩頭。借問船輕重。寄信到揚州。

周郊祀樂章

五代史樂志曰。太祖廣順元年。邊蔚議改漢十二成為十二順之樂。祭天神。奏昭順之樂。祭地祇。奏寧順之樂。祭宗廟。奏肅順之樂。登歌奠玉帛。奏感順之樂。皇帝行及臨軒。奏治順之樂。王公出入。送文舞。迎武舞。奏

忠順之樂。皇帝食舉。奏康順之樂。皇帝受朝。皇后入宮。奏雍順之樂。皇太子軒懸出入。奏溫順之樂。正至皇帝禮會登歌。奏禮順之樂。郊廟俎入。奏禋順之樂。酌獻飲福。奏福順之樂。祭孔宣父齊太公降神。同用禮順之樂。三公升降及行。同用忠順之樂。享籍田。同用寧順之樂。

昭順樂

五兵勿用。萬國咸安。告功圓蓋。受命雲壇。樂鳴鳳律。禮備雞竿。神光欲降。衆目遐觀。

治順樂

羽衛離丹闕。金軒赴秦壇。珠旗明月色。玉佩曉霜寒。黼黻龍衣備。琮璜寶器完。百神將受職。宗社保長安。

感順樂

明君陳大禮。展幣祀圓邱。雅樂聲齊發。祥雲色正浮。

禋順樂

黃彝將獻。犧牲預迎。既修昭事。潛達明誠。

福順樂

相承五運。取法三才。大禮爰展。率土咸來。卿雲祕室。甘泉寶臺。象樽初酌。受福不回。

福順樂

昊天成命。邦國盛儀。多士齊列。六龍載馳。壇升泰一。樂奏咸池。高明祚德。永致昌期。

福順樂

上天垂景况。哲后舉鸞觴。明德今方祚。邦家萬世昌。

忠順樂

木鐸敷音文德昌。朱干成列武功彰。雷發鸞羽今休用。玉鉞相參正發揚。

武舞樂

圭瓚方陳禮。干旄乃象功。成文非羽籥。猛勢若熊熊。

昭順樂

雲門孤竹。蒼璧黃琮。既祀天地。克配祖宗。虔修盛禮。仰答元功。神歸碧落。福降無窮。

周宗廟樂舞辭

唐餘錄。周宗廟樂。降神奏肅順。皇帝行。奏治順。獻信祖室。奏肅雍之舞。僖祖室。奏觀成之舞。太祖室。奏明德之舞。世宗室。奏定功之舞。酌獻登歌。奏感順。迎俎奏禮順。飲福奏福順。送文舞。迎武舞。奏忠順。武舞奏

善順。撤俎奏禮

順。送神奏肅順。

肅順

我后至孝。祇謁祖先。仰瞻廟貌。夙設宮懸。朱弦疏越。羽舞迴旋。神其來格。明祀惟虔。

治順

清廟將入。袞服是依。載行載止。令色令儀。永終就養。空極孝思。瞻望如在。顧復長違。

肅雍舞

周道載興。象日之明。萬邦咸慶。百穀用成。於穆聖祖。祇薦鴻名。祀於廟社。陳其犧牲。進旅退旅。皇武之形。一倡三歎。朱弦之聲。以妥以侑。既和且平。至誠潛達。介福攸寧。

章德舞

清廟新展。嚴禋恭祖。德厚人倫。雅樂薦禮。器陳儼皇尸。列虞賓。神如在。聲不聞。享必信。貌惟賁。想龍服。奠犧樽。禮既備。慶來臻。

善慶舞

卜世長。帝祚昌。定中國。服四方。修明祀。從舊章。奏激楚。轉清商。羅俎豆。列簪裳。歌纍纍。容皇皇。望來格。降休祥。祝敢告。壽無疆。

觀成舞

穆穆王國。奕奕神功。茲祀載展。明德有容。彝樽斯滿。簠簋斯豐。紛絺旄羽。鏘洋磬鐘。或升或降。克和克同。孔惠之禮。必肅之容。錫以純嘏。祚其允恭。神保是饗。萬世無窮。

明德舞

惟彼岐陽。德大流光。載造周室。澤及遐荒。於鑠聖祖。上帝是皇。迺聖迺神。知微知彰。新廟奕奕。豐年穰穰。取彼血膋。以往蒸嘗。黍稷惟馨。籩豆大房。工祝致告。受福無疆。

咸順

萬舞咸列。三階克清。貫珠一侶。擊石九成。盈觴雖酌。靈坐無形。永懷我祖。達其孝誠。

禮順

旨酒既獻。嘉穀乃迎。振其鼗鼓。潔以鉶羹。肇禋肇祀。或炮或烹。皇尸儼若。保饗是明。

福順

新廟奕奕。金奏洋洋。享于祖考。循彼典章。清醑特滿。嘉玉騰光。神醉既告。帝祉無疆。

忠順

稱文既表。溫柔德示。武須成蹈。厲容綴兆。疾舒皆應。節明明我祖。樂無窮。

善勝舞

五代史樂志周廣順元年改郊廟朝會舞名乃改漢治安為政和之舞振德為善勝之舞觀象為崇德之舞講功為象成之舞

聖祖累功。福鍾來裔。持羽執干。舞文不廢。

禮順

禮畢祀先。香散几筵。罷舞干戚。收撤豆籩。

肅順

樂奏四順。福受萬年。神歸碧天。庭餘瑞煙。

周朝饗樂章

唐餘錄周元正冬至朝饗樂公卿入奏忠順皇帝坐奏治順羣臣上壽奏福順皇帝舉壽酒登歌奏康順羣臣降階公卿出並奏忠順

忠順

歲迎更始節。及朝元冕旒。仰止冠劍相連。八音合奏。萬物齊宣。常陳盛禮。願永千年。

忠順

明君當寧。列辟奉觴。雲容表瑞。日影初長。衣冠濟濟。鐘磬洋洋。令儀克盛。嘉會有章。

治順

庭陳大樂。坐當太微。凝旒負辰。端拱垂衣。鴛鸞成列。簪組相輝。御爐香散。郁郁霏霏。

福順

聖皇端拱。多士輸忠。蠻觴共獻。臣心異同。聲齊嵩嶽。祝比華封。千齡萬祀。常保時雍。

康順

鴻鈞廣運。嘉節良辰。列辟在位。萬國來賓。干旌屢舞。金石咸陳。禮容既備。帝履長春。

忠順

禮成三爵。樂畢九成。共離金屣。復列彤庭。

忠順

明庭展禮。爲龍爲光。咸韶息韻。鸛鷺歸行。

全五代詩卷十八

吳

後主楊溥

後主溥楊行密第四子。僭位十六年。李昇篡。□□□□□□□□□□

十國春秋。齊主使徙帝居丹陽。命馬思謙為丹陽宮使。

以嚴口衛之。楊溥渡江賦詩云云。冬十月辛丑。是日有使命來徙所。帝方口佛書于樓上。使者趨前。帝以香爐擲之。俄而報晏駕矣。讓皇口口數年未卒。每有枯楊生枝葉。及五歲有中使賜衫笏加官。即日而終。江表志。讓皇居泰州永寧宮。嘗

賦詩

自歎

渡江

江南江北舊家鄉。二十年來夢一場。吳苑宮闈今冷落。廣陵臺榭亦荒涼。烟迷遠岫愁千點。雨打孤舟淚萬行。兄弟四人三百口。不堪回首細思量。

殷文圭

文圭池州人。居九華苦學。所用墨池。底為之穴。唐末。詞場請託公行。文圭與遊。恭獨步場屋。乾寧中及第。為裴樞宣諭判官。後事楊行密。拜翰林學士。終左千牛衛將軍。有登龍集。唐摭言。乾寧中。駕幸三峯。

殷文圭者。擢梁王表薦。及第。仍列于榜內。時楊令公行密鎮維揚。奄有宣浙。楊汴榛梗久矣。文圭家池州之青陽。辭親聞道。至行在。無何。隨榜爲吏部侍郎裴樞宣諭判官。至大梁。以身事叩梁王。王乃上表薦之。圭復擬飾非。遍投啓事于公卿間。略曰。於菟獵食。非求尺璧之珍。鷄鷩避風。不望洪鐘之樂。旣擢第。由宋汴馳闕。俄爲多言者所發。梁王大怒。亟遣追捕。已不及矣。然是屢言口。大率皆負心。常以文圭爲證。白馬之誅。靡不由此也。南唐近事。李德誠加司空。守臨川。文圭草麻。德誠濡筆之。賂不時至。文圭以詩督之云。紫殿西頭月欲斜。曾草臨川上相麻。潤筆已曾關奏謝。更飛章句問張華。

八月十五夜

萬里無雲鏡九州。最團圓夜是中秋。滿衣冰彩拂不落。遍地水光凝欲流。華嶽影寒清露掌。海門風急白潮頭。因君照我丹心事。減得愁人一夕愁。

省試夜投獻座主

闢開公道選時英。神鏡高懸鑒百靈。混沌分來融間氣。機槍滅處炫文星。燭然蘭省三條白。山東龍門萬仞青。聖教中興周禮在。不勞干羽舞明庭。

觀賀皇太子册命

嗣册儲皇帝命行。萬方臣妾躍歡聲。鸞旂再立星辰正。雉扇雙開日月明。自有漢元爭翊戴。不勞商皓定欽傾。春官保傅皆周召。致主何憂不太平。

賀同年第三人劉先輩鹹辟命

甲門才子鼎科人。拂地藍衫榜下新。脫俗文章笑鸚鵡。凌雲頭角壓麒麟。金壺藉草溪亭晚。玉勒穿花野寺春。多媿受恩同闕里。不嫌師僻與顏貧。

寄廣南劉僕射

戰國從今卻尙文。品流才子作將軍。畫船清宴□□□。粉閣閑吟瘴嶠雲。暴客卸戈歸惠政。史官調筆待儒勳。漢儀一化南人後。牧馬無因更夜聞。

經李翰林墓

詩中日月酒中仙。平地雄飛上九天。身謫蓬萊金籍外。寶裝方丈玉堂前。虎靴醉索將軍脫。鴻筆悲無令子傳。十字遺碑三尺墓。只應吟客弔秋煙。

題吳中陸龜蒙山齋

萬卷圖書千戶貴。十洲煙景四時和。花心露洗猩猩血。水面風披琴瑟羅。莊叟靜眠清夢永。客兒芳意小詩多。天麟不觸人間網。擬把公卿換得麼。

邊將別

地角天涯倍苦辛。十年鉛槧未酬身。朱門泣別同鮫客。紫塞旅游隨雁臣。漢將出師衝曉雪。胡兒奔馬撲征塵。行行獨止干戈域。毳帳望誰爲主人。

江南秋日

水國由來稱道情。野人經此頓神清。一篷秋雨睡初起。半硯冷雲吟未成。青笠漁兒筒釣沒。蓓衣菱女畫  
橈輕。冰綃寫上江南景。寄與金鑾馬長卿。

覽陸龜蒙舊集

先生文價沸三吳。白雪千編酒一壺。吟去星辰筆下動。醉來嵩華眼中無。峭如榭檜虬蟠活。清似緱山鳳  
路孤。身後獨遺封禪草。何人尋得佐鴻圖。

趙侍郎看紅白牡丹因寄楊狀頭贊圖

遲開都爲讓羣芳。貴地栽成對玉堂。紅豔裊煙疑欲語。素華映月只聞香。翦裁偏得東風意。淡薄似矜西  
子粧。雅稱花中爲首冠。年年長占斷春光。

初秋留別越中幕客

魂夢飄零落葉洲。北轅南柂幾時休。月中青桂漸看老。星畔白榆還報秋。鶴禁有知須強進。嵇峯無事莫  
相留。吳花越柳饒君醉。直待功成始舉頭。

贈戰將

綠沈槍利雪峯尖。犀甲軍裝稱紫髯。威懾萬人長凜凜。禮延羣客每謙謙。陣前戰馬黃金勒。架上兵書白  
玉籤。不爲己爲儒弟子。好依門下學韜鈴。

九華賀雨吟

陶公焦思念生靈。變早爲豐合杳冥。雷劈老松疑虎怒。雨衝陰洞覺龍腥。萬畦香稻蓬葱綠。九朵奇峰撲亞青。吟賀西成饒旅興。散絲飛灑滿長亭。

贈池州張太守

神珠無類玉無瑕。七葉簪貂漢相家。陣面奔星破犀象。筆頭飛電躍龍蛇。絳幃夜坐窮三史。紅旆春行到九華。只怕池人留不住。別遷征鎮擁高牙。

寄賀杜荀鶴及第

一戰平疇五字勞。晝歸鄉去錦爲袍。大鵬出海翎猶溼。駿馬辭天氣正豪。九子舊山增秀絕。二南新格變風騷。由來稽古符公道。平地丹梯甲乙高。

鸚鵡

丹觜如簧翠羽輕。隨人呼物旋知名。金籠夜黯山西夢。玉枕曉憎簾外聲。才子愛奇吟不足。美人憐爾繡初成。應緣是我邯鄲客。相顧咬咬別有情。

題友人庭竹

叢篁蕭瑟拂清陰。貴地栽成碧玉林。盡待花開添鳳食。可憐風擊狀龍吟。鈿竿離立霜文靜。錦籟飄零粉節深。何事子猷偏寄賞。此君心似古人心。

玉仙道中

尊鱸方美別吳江。筆陣詩魔兩未降。山勢北蟠龍偃蹇。泉聲東漱玉琤琮。古陂狐兔穿蠻塚。破寺荆榛擁佛幢。信馬冷吟迷路處。隔溪烟雨吠村厖。

題胡州太學邱光庭博士幽居

舜軌堯文混九垓。明堂宏博集良材。江邊雲臥如龍穩。天外泥書遣鶴來。五夜藥苗滋沆瀣。四時花影蔭莓苔。草元門似山中靜。不是公卿到不開。

中秋自宛陵寄池陽太守

出山三見月如眉。蝶夢終宵遶戟枝。旅客思歸鴻去日。賢侯行化子來時。郡樓遐想劉琨嘯。相閣方窺謝傳棋。按部況聞秋稼熟。馬前迎拜羨并兒。

和友人送衡尚赴池陽副車

淮王上將例分憂。玉帳參承半列侯。次第選材如創廈。別離排宴向藏舟。鷗鵬變化知難測。龍蠖升沈各有由。躩蹠行牽金鏤重。嬋娟立唱翠娥愁。築頭勳業諧三陣。滿腹詩書究九流。金海珠韜乘月讀。肉芝牙茗撥雲收。赤鱗旆卷鷗汀晚。青雀船橫雁陣秋。十字細波澄鏡面。九華殘雪露峰頭。醉沈北海千尊酒。吟上南荆百尺樓。況是昭明食魚郡。不妨閑擲釣璜鉤。

魴字伯魚。南昌人。從鄭谷爲詩。頗得鄭體。事吳爲宗正郎。與沈彬李建勳友善。集三卷。南唐書金山寺號爲

勝景。張祐吟詩。有僧歸夜船。月龍出曉堂。雲之句。自後詩人閣筆。魴復吟詩云云。時號絕唱。馬書三四作樓臺懸倒影。鐘磬隔囂塵。七八作誰言題咏處。流響更無人。茗溪漁隱張祐詩云一宿金山頂。微茫水國分。僧歸夜船月。龍出曉堂雲。

樹影中流見。鐘聲兩岸聞。因悲在朝市。終日醉醺醺。祐詩全篇皆好。魴詩不及之。有疵病。如驚濤濺佛身之句。則金山寺何其低而且小哉。誰言張處士二句。乃有矜御如此。尤可強鄙也。全唐詩話金山居大江中。迥然孤秀。詩意難盡。羅隱

云。老僧齋罷關門睡。不管波濤四面生。孫生句云。結字孤峯上。安禪巨浪間。馬書本傳。魴從鄭谷游。吟詩頗有鄭體。與沈彬李建勳爲詩社。彬好評詩。建勳常與彬議。時魴不在席。以魴詩詰之。彬曰。此非有風雅製度。但得人間烟火氣多爾。

魴遽出讓。彬曰。非有風雅固然。而謂得人間烟火氣何耶。彬笑曰。子夜坐句云。劃多灰雜蒼虬跡。坐久烟銷寶鴨香。非爐上作。而何。闔座大笑。吟窗雜錄。魴春日途中詩云。遊子未歸去。野花愁破心。金山詩云。分開潮海浪。留住過江雲。

皆佳句。

### 甘露寺

寒暄皆有景。孤絕畫難形。地拱千尋嶮。天垂四面青。晝燈籠雁塔。夜磬徹漁汀。最愛僧房好。波光滿戶庭。

### 題金山寺

山載江心寺。魚龍是四鄰。樓臺懸倒影。鐘磬隔囂塵。一作萬古波心寺。金山名目。新天多剩得。月地少不生塵。過榜妨僧定。驚濤濺佛身。誰

言張處士。題後更無人。

廬山瀑布

有山來便有萬丈落雲端。霧噴千巖溫。雷傾九夏寒。圖中僧寫去。湖上客迴看。卻羨爲猿鶴。飛鳴近碧湍。

牡丹

意態天生異。轉看看轉新。百花休放豔。三月始爲春。蝶死難離檻。鶯狂不避人。其如豪貴地。清醒復何因。

柳絮

年年三月裏。隨處自悠揚。雨過渾疑盡。風來特地狂。入花蜂有礙。遮水燕無妨。苦是添離思。青門道路長。

芳草

何處不相見。烟苗捧露心。萋萋緣遠水。苒苒在空林。野吹閑搖闊。遊人醉臥深。南朝古城裏。碑石又應沈。

春苔

底物最牽吟。春苔獨自尋。何時連夜雨。疊翠滿松陰。湘岸荒祠靜。吳宮古砌深。侯門還可惜。長被馬蹄侵。

看桑

簇簇牙相遮。閑看實可嗟。藉多雖是葉。栽盛不如花。春綠暗連麥。秋乾暮立鴉。舊鄉曾種得。經亂屬誰家。

老松

鬱鬱復蒼蒼。秋風韻更長。空心應有口。老葉不知霜。子落生深澗。陰清背夕陽。如逢東岱雨。猶得覆秦王。

柳

龍葱二月初。青軟自相紆。意態花猶少。風流木更無。影繁晴陌上。烟重古城隅。煬帝河聲裏。幾番榮又枯。  
主人司空後亭牡丹

佳卉挺芳辰。天容乃絕倫。望開從隔歲。愁過卽無春。體物真英氣。餘花似庶人。蜂攢知眷戀。鳥語亦慙慙。  
況在豪華地。寧同里巷塵。酷憐應喪德。多賞奈怡神。忌穢栽時士。嘗甜折處津。繞行那識倦。圍坐豈辭頻。  
入夢殊巫峽。臨池勝洛濱。樂喧絲雜竹。露漬卯連寅。飲興尤思滿。吟情自合新。怕風惟怯夜。憂雨不經旬。  
欄檻爲良援。亭臺是四鄰。雖非能伐性。爭免礙還淳。門豔何慚蜀。矜鱗未讓秦。私心期一日。許近看逡巡。

垂柳

垂柳碧髯茸。樓昏帶雨容。思量成畫夢。來去發春慵。梳洗憑張敞。乘騎笑稚恭。碧虛從轉笠。紅燭近高舂。  
怨臉明秋水。愁眉淡遠峰。小園花盡蝶。靜院酒醒蛩。舊作琴臺鳳。今爲藥店龍。寶奩拋擲久。一任景陽鐘。

題梅嶺泉

梅嶺舊聞傳。林亭勢崦然。登臨真不易。幽勝恐無先。楚野平千里。吳江曲一邊。標形都大別。洞府豈知焉。  
飛閣橫空去。征帆落面前。南雄雉堞峻。北壯鳳臺連。爛漫三春媚。參差百卉妍。風桃諸處錦。洛竹半溪烟。  
燕入晴梁語。鶯從暖谷遷。石根朝靄碧。簾際晚霞鮮。逕柳行難約。庭莎醉好眠。清明時更異。造化意疑偏。  
不獨宜韶景。尤須看暑天。藥苗繇似結。蘿蔓猛如編。珠亞垂枝果。冰澄汲井泉。粉牆蛻蛻落。丹檻雀雛顛。  
炎氣微茫覺。清飈左右穿。雲峰從勃起。葵葉豈勞扇。又見秋天麗。渾將夏日懸。紅黥著霜樹。香老臥池邊。

菱芡誰鋪繡。莓苔自學錢。暗蟲依砌響。明月逗簾圓。小砌滋新菊。高軒噪暮蟬。雨聲寒颯颯。雁影曉聯聯。釋此何堪玩。深冬更可憐。窗中看短景。樹裏見重川。岡阜分明出。杉松氣概全。謳成白雪曲。吟是早梅篇。剗制誰人解。根基太守賢。或時留皂蓋。盡日簇華筵。誰詠憂黎庶。狂遊泥管弦。交加豐玉食。來去送金船。侍從非常客。俳諧像列仙。畫旗張赫奕。妖妓舞嬋娟。罷宴心猶戀。將歸興尙牽。祗應愁逼夜。寧厭賞經年。孤賤今何幸。躋攀奈有緣。展眉驚豁達。徐步喜周旋。諷詠雖知苦。推功靡極元。聊書四十韻。甘責未精專。

看牡丹

莫將紅粉比穠華。紅粉那堪比比花。隔院聞香誰不惜。出欄呈豔自應誇。北方有態須傾國。西子能言亦喪家。輸我一枝和曉露。真珠簾外向人斜。

又題牡丹上主人司空

一年芳勝一年芳。愛重賢侯意異常。手闢紅房看闊狹。自張青幄蓋馨香。白疑美玉無多潤。紫覺靈芝不是祥。祗恐夢徵他日去。又須疑向鳳池傍。

牡丹落後有作

未發先愁有一朝。如今零落更魂銷。青叢別後無多色。紅線穿來已半焦。蓄恨綺羅猶眷眷。薄情蜂蝶去飄飄。明年雖道還期在。爭奈憑欄乍寂寥。

柳

數樹新栽在畫橋。春來猶自長長條。東風多事剛牽引，已解纖纖學舞腰。  
金堤堤上一林烟。況近清明二月天。別有數枝遙望見，畫樓南面拂鞦韆。  
小池前後碧江濱。翠拋青瀾漫春。不是和風爲擡舉，可能開眼向行人。  
深綠依依配淺黃。兩般顏色一般香。到頭嫵娜成何事，祇解年年斷客腸。

楊柳枝詞

靈和風暖太昌春。舞線搖絲向惜人。何似曉來江雨後，一行如畫隔遙津。  
彭澤初栽五樹時。只應閑看一枝垂。不知天意風流處，要與佳人學畫眉。  
暖傍離亭靜拂橋。入流穿檻綠陰遙。不知落日誰相送，魂斷千條與萬條。  
春來綠柳遍天涯。未見垂楊未可誇。晴日萬株烟一陣，閑坊兼是莫愁家。  
小眉初展綠條稠。露壓烟濛不自由。莫是折來偏屬意，依稀相似是風流。  
九衢春霽溼雲凝。着地瑣瑣礙馬行。擬折無端拋又戀，亂穿來去羨黃鶯。  
千樹陰陰蓋御溝。雪花金穗思悠悠。先朝事後應無也，惟是荒根逐碧流。  
搖蕩和風恃賴春。蘸樓遮路逐年新。顛狂絮落還堪恨，分外欺凌寂寞人。  
暖催春促吐芳芽。伴雨從風處處斜。莫道元功無定配，不然爭得見桃花。

湖山望廬山

輟權南湖首重迴。笑青吟翠向崔嵬。天應不許人全見。長把雲藏一半來。

康駢

駢字駕輕。池州人。登第爲崇文館校書郎。後爲吳王楊行密大將田頔客。荐授中書舍人。所著

有劇談錄。

詩話劉長卿有謫仙怨詞云。晴川落日初低。惆悵孤舟解攜。鳥向平蕪遠近。人隨流水東西。白雲千里。萬里。明月前溪後溪。獨恨長沙謫去。江潭春草淒淒。後台州刺史竇宏餘。有廣謫仙怨并序云。天寶十五載正月。

安祿山反。陷沒洛陽。王師敗績。關門不守。車駕幸蜀。途次馬嵬驛。六軍不發。賜貴妃自盡。然後駕行。次駱谷。上登高下馬。望秦川。遙辭陵廟。再拜嗚咽流涕。左右皆泣。謂力士曰。吾聽九齡之言。不到於此。乃命中使往韶州。以太牢祭之。因上馬索長笛。吹笛曲成。潛然流涕。佇立久之。時有司旋錄成譜。及鑿駕至成都。乃進此譜。請名曲。帝謂吾因思九齡。亦別有意。可名謫仙怨。其旨屬馬嵬之事。厥後以亂離隔絕。有人自西川傳得者。無由知。但呼爲劍南神曲。其音怨切。諸曲莫比。大歷中。江南人盛爲此曲。隨州刺史劉長卿。左遷睦州司馬。祖筵之內。長卿遂撰其詞。吹之爲曲。意頗自得。蓋亦不知本事。余旣備知。聊因暇日。撰其詞。復命樂工吹之。用廣其不知者。其詞云。胡塵犯闕衝關。金輅提攜玉顏。雲雨以時消散。君王何日歸還。傷心朝恨暮恨。回首千山萬山。獨望天邊初月。蛾眉猶自彎彎。駢更廣其詞。今并載之。其詞云云。

廣謫仙怨并序

竇使君序謫仙怨云。劉隨州之辭。未知本事。及詳其意。但以貴妃爲懷。蓋明皇登駱谷之時。實有思賢之意。竇之所製。殊不逮焉。駢因更廣其辭。蓋欲兩全其事。雖才情淺拙。不逮二公。而理或可觀。貽諸識者。

晴山礙日橫天。綠疊君王馬前。鑾輅西巡蜀國。龍顏東望秦川。曲江魂斷芳草。妃子愁凝暮烟。長笛此時吹罷。何言獨爲嬋娟。

盧蘋

蘋洛陽人。事吳。歷官至司農卿。

蛺蝶行

東園宮草綠。上下飛相逐。君恩不禁春。昨夜花中宿。

東西行

種荷玉盆裏。不及溝中水。養雉黃金籠。見草心先喜。

無題

春淚爛羅綺。泣聲抽恨多。莫滴芙蓉池。愁傷連帶荷。一朵花葉飛。一枝花光彩。美人惜花心。但願春長在。

李章

章吳後主時人。官百勝軍節度使。加中書令。

春遊吟

初春徧芳甸。十里藹盈矚。美人摘新英。步步翫春綠。所思杳何處。宛在吳江曲。可憐不得共芳菲。日暮歸

全五代詩 卷十八

來淚滿衣。

三〇八

